

Wasika-à Bulus Ba Ya Sig Mpìrká Mà KORINTI Wà Wa Zyun

Jírká kim kim kà sig áyau mpìrká ri bàg Yesu mà Korinti. Bulus ba ya big wasika jirà abig yì barà bá dang jír káníng áni. Mpìrká ri ngàng kwonn fig awun í byar nzyun bàna, mpìrká káhi ri sa àyái, káhi ri sa yipyàr á shinn wí zwam wà mpìrká ya sig bu sinn. Shìdun ya sig Bulus yar ùwài nímá barà kwá tàg big bu-à bá sa áyau jír káníng ni. Bulus dinya big rag azim í bu ùwài-à Shìdun ya sig mpìrká ri bàg ku. Sura 13 ri dang jír á shinn azim. Mpìrká nìnànn nímá á dunyaru ri dang sura-à níng ma shinn.

¹ Wasika-à níng í mì Bulus n̄ ba síg n̄. I mì zyun-à Shìdun zìm sig rag n̄ shi wùn aswam Yesu Kristi. Mì ma wunzàyí Sastanisú ba ya síg ning n̄.

² Yi ri bib kà ning, ning mpìrká ri bàg Shìdun á finn swann Korinti. Ning shi síg n̄ mpìrká ká Shìdun shig zu sig ning, jirà aning shi mpìrká kyìkyàr á pyànnwá ni. Ning shí n̄ mpìrká buwá á jir shinn Yesu Kristi. Ku shig zu sig ning kwonn big mpìrká kim kim á dunyaru, ká bir sig pìkyinn á byar Yesu, n̄ kwonn sig ning ma big í byar nzyun á zinn Yesu Kristi. Yesu shí n̄ Shinn Lubá ma Shinn Luyí tinn.

³ Tayí Shìdun ma Shinn Luyí Yesu Kristi abig wìr kà ya ning àsànbá, ma abig sa tag wann pìkyinn ná.

Bulus Sa Shìdun Isoko Jir Bu Nsànká Shìdun Ya Sig Mpìrká

⁴ Mì ri sa kyann Shìdun ísoko barà ku sa ya sig ning bu ñsàn á jir shinn Yesu Kristi.

⁵ Ku sa sà n ya sig ning bu nìnànn nímá á jir shinn Yesu ni. Wàníng í bu-à sa ning dang yì hing jír wá wàni, mi ri yì byann jír wá.

⁶ Bu-à yi dinya sig ning á shinn Yesu Kristi ni níng, tàma-à níng ning yì rag hing wà í àjai, á jir barà shuná ning shi sig tàma-à níng kim ma wà sai-à rì.

⁷ Jir wàníng Shìdun sa sà n ya sig ning á gbìb nìnànn nímá, barà ning ri sa àtùtwài, mi ri shi kir àyúnn-à Shinn Luyí Yesu Kristi má kàng bi.

⁸ Kwá sinn ning barà ná sar ma gbam hár àyúnn-à Yesu má kàng bi. Ayúnn-à níng hi, bá díg fig ning ma laifi bàna.

⁹ Shìdun zyunn-à bar sig ning n kwonn sig ning ma wùnwá Yesu Kristi Shinn Luyí níng, ku í mpìr gwangga.

Mpìrká Ri Bàg Yesu Gàfinn

¹⁰ Wunzámí big, mì ri vig ning á zìnn Shinn Luyí Yesu Kristi, aning kwonn nuná í byar ñzyun, kada aning gàfinn bàna. Bu-à ná kyab, ma bu-à na ri zìm á kyinn ná ni bidìm pár, aku shí bu ñzyun.

¹¹ Wunzámí big, bu-à sa mì ri dinya ning àdòníng, mpìrká mà lu Kuluwu bi dinya mì rag yipyàr kà hing áyauná ni wàni.

¹² Bu-à sa mì ri dang àdòníng, jir kai bàna ning ri yàng dang buká kim kim, zyun ri dang rag ku í mpìr Bulus, zyun rag ku í mpìr Apolos, zyun rag ku í mpìr Kefas, zyun rag ku í mpìr Kristi.

¹³ Asái Kristi gàfinn rìghing áni kyau kyau rà? Mpìr-à big dab bàg gbam sig á bín-à ni jir shinn ná níng í Bulus rà? Big wau sig ning òr batisma ma zìnn Bulus rà?

¹⁴ N gode hìng Shìdun barà n wau fig kó mpìr nzyun áyauná ni òr batisma bàna, sái íri Kirisbus ma Gayus, í nànn-à hi.

¹⁵ Jir wàníng kó mpìr nzyun má dang fig rag, n wau sig ku òr batisma á zìnnmí ni bàna.

¹⁶ Sái n wau sig Istifanas, ku ma mpìrká á luwá ni. Wà má í ku bàna, mì ri kyab n wau fig rag mpìr zyun bàna.

¹⁷ Ning yì hìng Kristi swam bi fíg mì jirà n wau mpìr òr batisma bàna. Ama ku swam bi síg mì jirà n dinya mpìrká jir àjwárwá níng. Ku dinya fig mì rag, n dang jírwá big yar shinnmí bàna, jirà kada gbam jírwá, barà ku wu sig mà atàm bín-à ni níng, aku jànn kà átai bàna.

Yesu Kristi í Yar Shìdun

¹⁸ Mpìrká ká má kà á lu pyìr níng, big sìnn kàng rìghing jir ki Yesu àràg í jir àning. Ama yiká zyun-à bá pinn zu yì níng, yì sìnn kàng rìghing jí-r-à hi rag í gbam Shìdun.

¹⁹ Aning myàng barà big ba sig jí-r-à níng á tarkada Shìdun. Ku dang rag,

“Má sa yànn mpìr yarká. Ma sa bai rìg yarbá.”

²⁰ Wà má àdòníng, bu-à mpìr yar má sa kinn í kai rà? Yarwá má zìg yag ku áni rà? Shìdun

sinn kàng rìghing yarká á dunyaru bidìm pár í bu àning.

²¹ Shìdun ma yarwá ya fig mpìrká barà bá yì ku ma yarbá zyun-à big shi sig ma kàhi níng bàna. Kwá pinn zu mpìrká á jir shinn jir àjwár zyun-à yi ri dinya big, wà zyun-à mpìrká káhi sinn kàng sig àràg í jir àning.

²² Mpìr Yahudawaká ri zìm abig myàng ma bu mamaki mpyim, í wà bá bir pìkyinn íni. Mpìr Helenawaká ri zìm abig fig jir yar mpyim, í wà bá bir pìkyinn íni.

²³ Ama buyí yi ri dinya mpìrká jir barà big dab bàg gbam sig Yesu. Wà á byar Yahudawaká ni jír-à hi shi ya sig big bu-à àsiu má ta big áni. Mpìrká ká í Yahudawa bàna ri myàng jír-à hi shi sig í jir átai, í jír-à bàna ma yìr.

²⁴ Ama mpìrká ká Shìdun shig zu sig níng kó Yahudawaká kó ká í Yahudawa bàna, barà big fig sig jír-à níng, big myàng Kristi í gbam Shìdun big yar Shìdun.

²⁵ Bu-à Shìdun sa sig zyun-à mpìrká ri sinn kàng í bu átai níng, bu-à hi kab síg nì yarbá. Bu-à Shìdun sa sig níng, big ri myàng rag bàna ma gbam, ama bu-à hi kab síg nì gbambá.

²⁶ Wunzámí big, aning myàng barà Shìdun bar zu sig ning áyau bu-à ning rì shi sig áni. Asai-à níng hi, ning rì yar nànn fig ma á dunyaru bàna. Ning rì bàna ma gbam tinn. Ning rì í mpìr ùwài bàna.

²⁷ Ama Shìdun shig zu mpìrká zyun-à káhi ri kyab rag káníng í àning níng, jirà abig sa pànn mpìr yarká zunái. Ku shig zu mpìrká zyun-à

bàna ma gbam, jirà abig sa pànn mpìr gbamká zunáí.

²⁸ Ku shig zu sig mpìrká zyun-à káhi ri myàng rag kinn fig bu bàna, mi ri sa káníng yawari, ku shig zu káníng jirà a káníng sa bai rig bu-à mpìrká á dunyaru ri kyab rag í bu sisàn,

²⁹ àjirà kada á mpìr zyun gbar dù nann zu shinn á pyànn Shìdun ni bàna.

³⁰ Shìdun í àsàin-à kwonn sig ning ma Yesu Kristi. Shìdun sinn sig Kristi jirà aku tàg yar yi. A jir shinn Kristi ni, í bu-à sa Shìdun myàng yi rag yi mpìrká sisàn. Ku sinn kàng yi mpìrká kyìkyàr á jir shinn Kristi. Kristi í àsàin-à zìg zu sig yi.

³¹ Big ba sig á tarkada Shìdun ni rag, “Kada mpìr aku swam yan shinnwá bàna, sái aku swam yan Shìdun.”

2

Jír á Shinn Barà Yesu Kristi Wu Sig Mà Atàm Bín-à Ni

¹ Ning wunzámí big, sai-à n rì bi á byarná ni, n dinya ning jír nzwàun bu Shìdun níng, n dinya fig ning jír ma yar shinnmí bàna.

² Sái-à n shi sig mà byarná ni n kyab á pìkyinnmí ni rag má dang fig bu zyun kim bàna, sái íri jir Yesu Kristi barà ku wu sig ma atàm bín-à ni.

³ Sai-à n shi sig á byarná ni, n yì fig barà má dang jír áni bàna. Mì ri shàr zinn, kwonn ma òr zwab.

⁴ Bu-à n tàg sig ning níng, n tàg fíng ning ma yar dunyaru bàna. Ama àràg barà ning myàng n tàg sig ma gbam Awun Shìdun.

⁵ Bu-à sa ning bir sig pikyinn á byar Kristi níng í jir gbam-à Shìdun shì sig ma kàhi, í dò jir yar mpìr jíkwìnn bàna.

Shìdun Ya Hing Yi Yarwá

⁶ Ama mì ri dang jí ma yar sai-à mì ri dinya mpìrká ká yì sig swàm Shìdun wàni. Ama yar-à mì ri dang ma kàhi níng, í yar dunyaru bàna. Mpìrká ká shì sig ma gbam á dunyaru, bu-à mì ri dang níng, shì fig yar á byarbá ni bàna. Bubá tàma-à níng big shì sig ma gbam, ama á pyànn, gbambá má vinn rìg.

⁷ Ama yar Shìdun, zyun-à yi ri dinya ning níng, Shìdun tàmm jànn rìghing kàhi, jir kai bàna í yar dunyaru bàna. Yar-à níng hi, Shìdun sinn sig daka sai-à ku màmm fig ma dunyaru bàna. Ku sinn sig rag, kwá ya yi. Ku dinya fig mpìrká wàri bàna, sái yi.

⁸ Agbamká á dunyaru myàng yì fig yar-à níng hi bàna. Big nìmm ma myàng yì hing, big nìmm má gban fig Shinn Luyí zyun-à shì sig ma gbam níng mà bín-à ni bàna.

⁹ Ama buyí yi myàng yì rìghing yar-à níng, jir kai bàna big ba sig á tarkada Shìdun ni rag,

“Bu-à mpìr taba myàng fig ma zu bàna,

n fig fig ma sung bàna,

hár ma bu-à mpìr yì fig wà kwá kyab dìg bàna,

í bu-à Shìdun tìya sig mpìrká ri zìmm ku.”

¹⁰ Awun Shìdun í àsàin-à tìya sig yi buká Shìdun ya sig yi. Ku í àsàin-à ri yì bu bidìmm pàr, ma bu tütùká Shìdun tàmm sig.

¹¹ Bu-à mpìr ma ri kyab, jàuwá má yì fig bàna, sái ku ma pìkyinnwá. I barà mpìr má yì fig bu-à Shìdun ri kyab bàna, sái íri Awunwá.

¹² Awun-à yì shì sig ma kàhi níng í awun-à wà á dunyaru bàna, í wà zyun-à bì sig mà byar Shìdun, jirà ayi yì buká Shìdun ya sig yi.

¹³ Yi má, barà Awun Shìdun shì sig á kyinnyí ni àdòning, í bu-à sa yi ri dinya fig ning bu-à yì fig sig á byar mpìr bàna. Yi ri dinya ning bu-à Awun Shìdun dinya sig yi á kyinnyí ni. I barà yi ri tàg ning, ningká zyun-à ning shì sig ma Awun Shìdun á pìkyinn ná ni, yi ri tàg ning ma yar-à Awun Shìdun ya sig yi.

¹⁴ Mpìr-à ma bàna ma Awun Shìdun á kyinnwá ni, kwá zìg fig jír-à Awun Shìdun ri tàg níng bàna. Buwá kwá yì byann fig bàna. Kwá myàng shì àràg í bu átai. I bu-à sa kwá yì byann fig jir Shìdun bàna, wà Awun Shìdun ma tiya fig ku bàna.

¹⁵ Ama mpìr-à ma shì sig ma Awun Shìdun á kyinnwá ni, kwá yì barà kwá gàfinn bu-à sísàn ma bu-à bibai. Mpìr má dang pànn fig ku ma jír bàna.

¹⁶ Jir Shìdun dang sig rag:
 “Mpìr má yì byann fig barà kyinn Shìdun shì sig áni,
 má tàg ku bu bàna.”
 Ama buyí yi zìg sig kyinn Kristi.

3

Mpìrká Ri Sa Swàm Shìdun

¹ Wunzámí big, ò dinya fig ning jír àràg barà mì ri dinya mpìrká ká shì sig ma Awun Shìdun

ning bàna. Ama ò dinya sig ning àràng barà mì ri dinya mpìrká ká ri bàg íri dunyaru, ká shi sig àràng í yann wùnshái títi áyau gbìb Yesu.

² Jír-à mì ri dinya ning níng, shi sig àràng mì ri ya ning myann. Ning fòr fig barà ná ji buju bàna. Hár tàma-à níng má, ning fòr fig bàna.

³ Hár tàma-à níng ning shi sig ma kyinn-à ri bàg dunyaru. Ning ri sa òrná akyib, mì ri gbìb shùr àràng barà mpìrká ri bàg dunyaru ri sa níng, kó níma bàna rà?

⁴ Mpìr zyun ri dang rag, ku í mpìr Bulus. Mpìr zyun bó ri dang rag ku í mpìr Apolos. Wàníng í barà mpìrká ri bàg dunyaru ri dang áni.

⁵ Aning myàng, Apolos í ni rà? Bulus í ni rà? Yi bidim pár yi í fàu Shìdun, yi wam zu fig wàníng bàna. Yi fàu Shìdun, yi tìya sig ning nì barà ná bàg Shìdun áni. N shi sig ma swàmmí, Apolos shi sig ma swàmwa tinn. Kó ni bidim pár shi sig ma swàm bu-à Shìdun ya sig ku.

⁶ Bumí ò tàg sig swai bu, Apolos í àsàin-à wìr sig zàpìr áni. Ama Shìdun í àsàin-à má sa wài buju-à.

⁷ To, mpìr zyun-à ma ri tàg bu, ku fòr fig bu zyun bàna. Zyun-à ma ri wìr zàpìr má, ku fòr fig bu zyun bàna tinn. Shìdun àsàin-à má sa bu-à má wài, í ku shi síg nì mpìr ùwài.

⁸ Ayau mpìr-à ma ri tàg bu ma mpìr-à ma ri wìr zàpìr áni, big bidim pár big màg sig ábibir, zyun kab fig jàuwá bàna. Ama Shìdun má ya kó ni anì swàmwa bar swàm-à ku sa sig.

⁹ Buyí yi ri sá bu-à Shìdun ma dinya yi. Buná ning shí nì da Shìdun. Yi ri sa swàm áyau da Shìdun.

Wàníng má, ning shi àràg í tonn Shìdun.

¹⁰ Tonn-à níng hi, mì Bulus ò jag síg nì mìr tonn-à hi. N sa sig swàmmí àràg mpìr-à mi yì hing tonn wàni. I Shìdun tìya síg mì nì, ò sa yì swàm-à níng. I wà tàma-à níng mpìr zyun bi, mi ri mi buwá wà mími. Mpìr-à ma ri mi tonn-à hi, aku hakyira barà ku ri sa swàmwá áni.

¹¹ Mìr tonn-à Shìdun jag sig níng, mpìr má jag yì sar fig zyun kim bàna, sái zyun-à Shìdun jag bab sig níng. Mìr tonn-à níng hi í Yesu Kristi.

¹² Mpìr-à ma mi hing buwá ma zinariya kó àsháu, kó abàn, sàh hing. Ama mpìr-à ma mi hing buwá ma bín, kó byann, kàhi sàh fig bàna.

¹³ Ayúnn-à Yesu Kristi ma kàng bi áni, Shìdun má tìr bi pyìr àjìrà aku màg màg fig swàm-à kó ni sa sig.

¹⁴ Mpìr-à swàmwá ma zu hing áyau pyìr-à ni, kwá díg ladawá.

¹⁵ Mpìr-à swàmwá ma zu fig bàna, ku kù rìghing, kwá díg fig lada bàna. Ama kwá wìm zu. Ama má shi àràg ku wìm zu sig áyau pyìr.

¹⁶ Asái ning yì fig bàna rà? Dìrná shi sig í lu Shìdun, Awunwá shi sig á pikyinn ná ni.

¹⁷ Mpìr zyun-à ma sa bai lu Shìdun, Shìdun má sa bai ku tinn, jir kai bàna Shìdun sinn sig luwá í bu kyìkyàr. Níng bó, ning shi síg nì lu-à hi.

¹⁸ Kada mpìr aku tonn gban shinnwá bàna. Mpìr-à ma dang rag ku í mpìr yar á dunyaru-à níng ni, aku sinn kàng shinnwá àràg ku í mpìr yar bàna, í wà kwá shi mpìr yar á pyànn Shìdun.

¹⁹ Bu-à mpìrká á dunyaru ri myàng àràg shi sig í bu yar, Shìdun ri sinn kàng shi sig í bu àning,

jir kai bàna big ba sig á tarkada Shìdun ni rag, “Mpìr-à ma shì sig big yar, Shìdun má zìg yarwá má tor pànn ku ma kàhi.”

²⁰ Big ba sig rag, “Shìdun yì hing rag bu-à mpìr yar ri kyab bidim pàr, bàna ma yìr.”

²¹ Jir wàníng kada aning gbar dù shinn ma aning yan mpìr jíkwinn jir yarwá bàna. Shìdun ya kà sig bu bidim pàr á vùná ni.

²² Ku ya sig ning Bulus ma Apolos ma Kefas, ma dunyaru, ma yonki, ma ki, ma buká tàma-à níng, ma buká má bi á pyànn.

²³ Ning í bu Kristi. Kristi í bu Shìdun.

4

Bulus Big Jàu Swàmwá Big, Big í Yann Aswamká Bu Kristi

¹ Aning myàng yi àràng yi í fàu Kristi, barà ku ya kà sig swàm-à níng á vùyí ni. Shìdun ya sig yi amana rag ayi dinya mpìrká jírwá, zyun-à ku tàmm jànn sig.

² Mpìr-à ma zìg hing amana níng, aku sa swàmwá ma kyinn ízyun.

³ Wà má í ning kó ma í mpìr zyun kim ma rag kwá màg màg fig swàmmí, wàníng shi fig í bu zyun bàna. Kó mì ma shinnmí má, má màg màg fig fig swàmmí bàna, sái Shìdun.

⁴ A kyinnmí ni ò yì fig wà kó ò sa hing bu bibai áyau swàmmí ni bàna. Ama wàníng má sinn kàng fig mì mpìr gwangga bàna. Wà ma sa hing bu-à sisàn, kó bu-à bibai, Shìdun í àsàin-à má dang.

⁵ Jir wàníng kada aning wà kwonn tàma-à níng á shinn swàm-à mpìr ma ri sa bàna. Ayúnn-à Yesu ma kàng bi hing, ku í àsàin-à má fù zu bu-à mpìr bònn sa sig. Kwá dang kyàr vinn rìg bu-à mpìr ri kyab á kyinnwá ni, í wà Shìdun má swam yan kó ni á jir swàm-à ku sa sig.

⁶ Wunzámí big, jir buká mì ri dinya ning níng, mì ri sa ya ning misali á shinnmí ni, yi ma Apolos. N dang fíg mpìr zyun kim bàna. Bu-à sa níng, mì ri zìm aning myàng bar bu-à yi ma Apolos ri sa jirà aning yi yìr jír-à big dang sig rag, “Kada aning wam zu nu bu-à big ba sig bàna,” jirà kada aning yan malam zyun, ma aning sa zyun yawari bàna.

⁷ Mpìr-à sinn kà sig wù á shi àgbam á shinn mpìrká kádà ni í ni rà? Kó kai bidìm pàr, í Shìdun ya síg wù nì. To, ma bu-à sa wù ri gbar dù shinn mi ri swam yan shinnwú, í jir kai rà?

⁸ Ning ri kyab ning kab sig kó ni bidìm pàr ma pìkyinn òsàn. Ning ri kyab ning shi sig mpìr sèsàn á pyànn Shìdun ni. Ning ri kyab rag ning kab síg yi nì, ning kàng rìghing kùr. Mì ri zìm aning na kùr àjai, àjirà ayi ma ning na kùr ábir-à ni.

⁹ A byarmí ni, mì ri myàng shi sig àràg í Shìdun sinn síg yi nì yann aswamká buwá yi fòr fig mpìrká kádà bàna. Buyí yi shi sig àràg mpìrká bá gban rìg áyau bìr-à ni. Yi shi síg bu-à mpìrká ma yann aswamká bu Shìdun mà wai má myàng.

¹⁰ Mpìrká ri myàng yi àràg yi í àning, jirà yi ri bàg Kristi. Ama buná, ning ri kyab ning í mpìr yar á byar Kristi. Buyí yi bàna ma gbam. Ama

buná ning shi sig ma gbam. Ning í mpìrká big ri wib ning, ama buyí yi yann aswam Shìdun, big ri sa yi yawari.

¹¹ Hár àràg tàma-à níng amor ri gban yi, ajor zàpìr ri gban yi, yi dìg fig jà-à yá wìr bàna. Big ri dab yi gbàr wàni, hár yi bàna ma byar shu.

¹² Yi ri sa swàm, mi ri ji ma gbamyí. Wà mpìr ma swau yi shì má, yi ri dang rag a Shìdun ya ku. Wà ba ya yi shwìn yi ri bà kyinn.

¹³ Wà ba dang jír-à bibai á shinnyí ni, yi ri dinya pyann kàng fig big bàna. Hár tàma-à níng mpìrká ri sìnn kàng yi àràg í bu-à mà kwìm yinn.

¹⁴ Mì ri ba ya fig ning bu káníng jirà n sa pànn ning zunái bàna, ama n ba síg jirà n twìb ning byur, jir kai bàna mì ri zìm ning àràg ning í yannmí big.

¹⁵ Kó barà ning shi sig ma malamká nìnànn nímá ká ri tàg ning jir Kristi, ama ning shi sig ma ta nzyun, ta-à hi í mì. I mì n dinya síg ning nì jir àjwár bu Shìdun. N kàng rìghing taná á dò barà n tàg sig ning gbìb Yesu Kristi.

¹⁶ To, barà mì í taná, sái aning sa àràg barà mì ri sa.

¹⁷ Wàníng í bu-à sa mì ri swam yag Timoti á byarná ni. Ku shí nì wùn mí á jir shinn Yesu. Asàmí yi ma ku kwonn hing wàni. Ku í mpìr-à mì ri bir pìkyinnmí á byarwá ni. Kwá kyab pànn ya ning bar shumí á gbìb Kristi ni, ma bu ùwàiká mì ri tàg kyann mpìrká kó áni bidim pár á shinn Kristi ni.

¹⁸ To, mpìrká kádà áyauná ni ri kyab rag má bi fòr fig á byarná ni bàna, big kà mì ri gbar dù shinn.

¹⁹ Ama wà Shìdun ma zìm hing, má nonn fig bàna mì ri bi. Má fig fig íri jír-à ba dinya mì bàna, ama má myàng wà ba shi sig ma gbam áyau Kristi.

²⁰ Kùr Shìdun shi fig íri jír dang átai bàna, sái ma gbam-à mpìr ri bàg Shìdun ma kàhi.

²¹ To, sai-à ma bi hing, ning ri zìm n yan ta ning rà, kó n bi ma kyinn ajun rà? Bu-à ning ri zìm í wà áni rà?

5

Mpìr Zyun Ayau Mpìrká Ri Bàg Yesu Sa Ayái

¹ N fig big rag, mpìr zyun áyauná ni ri sa bu-à sànn fig bàna. Bu-à hi kó mpìrká ká ri bàg fig Yesu bàna big ri sa fig kàhi bàna. Big rag mpìr-à hi ri sè wà tawá.

² N fig big rag ning kyab fig bu-à níng hi bàna, mi ri gbar dù shinn. Wàníng í bu-à ning nìm má bai pìkyinn áni. Mpìr-à sa sig íri bu-à níng, aning kan zu rìg ku áyauná ni.

³ Kó barà n bàna mà byarná ni níng, mì ri kyab bu-à níng á kyinnmí ni. N wà rìghing kwonn mpìr-à sa sig bu-à níng á zìnn Shinn Luyí Yesu ni, shi àràg n shi sig màhàn.

⁴ Sái-à ning ma ri kwonn shinn, pìkyinnmí shi sig mà byarná ni, kwonn ma gbam Shìdun.

⁵ Aning zìg mpìr-à níng hi, aning pa kà á vù Shaitan jirà a Shaitan sa bu-à ku ri zìm ma òr mpìr-à níng, jirà yonkiwá má wìm zu àyunn-à Yesu má kàng bi.

⁶ Barà ning ri gbar dù shinn àdòníng, sànn fig bàna. Yìr sìg nzyun í àsàin-à ri sa bai kádà, àràg barà yisti títi nímá ri sa lib brodi.

⁷ Aning kan zu rìg bu bibai-à níng áyauná ni, jirà kada aku swàb kà yag mà pyànn bàna, jirà aning kàng mpìr kyìkyàr. Shìdun sinn kàng sig ning mpìr kyìkyàr á jir shinn barà Kristi wu sig á dò jir shinn ná ni, àràng barà big ri gib gban àdùn á pyànn Shìdun ni àyúnn Pìm Wam Zu.

⁸ Jir wàníng, sai-à yi ma ri ji bùkí bu àyúnn Pìm Wam Zu, kada ayi sa akyib ma bu-à bibai àràng wàri bàna, jir kai bàna bu bibai-à níng ri swàb kà àràng barà yisti ri sa lib brodi. Kada ayi shi kwonn ma yisti àkwor-à níng bàna. Ayi shi àràng brodi zyun-à bàna ma yisti. Ayi shi mpìr gwangga ma pìkyinn kyìkyàr.

⁹ Wàri níng, ò rì ba ya sig ning wasika rag, kada aning bàg kyann òr ma mpìrká ri sa àyái bàna.

¹⁰ N dinya fig ning rag aning gàb rìg òr ma mpìrká yì fig Shìdun bàna, mi ri sa bu-à bibai àràng àyái sa, ma sunu bu-à bibai sa, ma ajwú jwi, ma buki sa níng, bàna. Mpìrká yì fig Shìdun bàna níng, ning ma big shi kwonn sig í zyun á dunyaru. Ning bàna ma pyù-à ná gàb òr ma big.

¹¹ Jírmí ò dinya sig ning níng, ò dang síg áshinn mpìrká ri dang rag big ri bàg Yesu, ama big ri sa bu-à bibai àràng àyái sa, sunu bu-à bibai sa, buki sa, mpìr zìnn swau, shin wa pyann, ajwú jwi. Irì mpìr káníng, kada aning kwonn shinn ma big bàna. Buju má, kada aning ji kwonn ma big bàna.

¹²⁻¹³ Mpìrká ká ri bàg fig Yesu bàna, walai bu-à du yi barà yá wà big kwonn. Mpìr-à má wà big kwonn í Shìdun. Ama ká ri bàg Yesu, í ká zyun-à ná wà big kwonn. To, mpìr-à sì sig wà tawá

ning, aning kan zu rìg ku áyauná ni.

6

Kada Aning Bar Kara Bar Dìrná á Byar Ká Ri Bàng Fig Yesu Níng Bàna

¹ Ayau níngká ning ri bàng Yesu, wà mpìr zyun áyauná ni ma shi sig ma jír ma jàuwá, bu-à sa kwá zìg yag jír-à hi á byar agib jírká, ká ri bàng fig Yesu bàna, í jir kai rà? Bu-à sa kwá zìg bi fig á byar mpìrká ri bàng Yesu bàna, í jir kai rà?

² Ning mpìrká ri bàng Yesu, ning í àsàinká má wà kwonn mpìrká á dunyaru. To, wà má àdòning, bu-à sa ná wà sar fig kwonn títi bàna, í jir kai rà?

³ Ning yì fig wà yi mpìrká ri bàng Yesu, yá wà kwonn yann aswam Shìdun ká mà wai bàna rà? Wà má àdòning, bu-à sa yá gib yì sar jír á dunyaru bàna, í jir kai rà?

⁴ Wà jír ma dù hing áyauná ni, bu-à sa ná zìg yag á byar mpìrká fòr fig bu zyun áyau mpìrká bu Shìdun ni bàna, í jir kai rà?

⁵ Bu-à mì ri dang níng, mì ri zìm aning fig zunái. Asái ning bàna ma mpìr yar kó nzyun áyauná ni zyun-à má gib ya ning jír rà?

⁶ Bu-à sa mpìr-à ri bàng Yesu má bar kara jàuwá á byar mpìrká ká yì fig jir Shìdun bàna, í jir kai rà?

⁷ Wà wa bar hing kara jàuwú, wàning ri tàg rag wù ri bàng fig Yesu bàna. Sànkab sig aning tib pìkyinn ná, kó mpìrká ma lir ji ning, kó wà ba jwi ning bu.

⁸ Ama há r ning ri lir ji kàng bar òrná, mi ri jwi bar òrná ajwú, áyau ningká ning ri bàg Yesu.

⁹ Kada aning tonn gban shinn ná bàna. Mpìr bibaiká má òg fig pyù barà bá kà á byar-à Shìdun na sig kùrwá bàna. Mpìr-à ma ri sa àyái, ma mpìr-à ma ri sa buki, ma mpìr-à ma sì wà jàuwá, mpìr-à ma ri na ma jàuwá wunù,

¹⁰ mpìr-à ma ri jwi ajwú, mpìr-à ma ri sa sunu, mpìr-à ma ri wa pyann shin, mpìr-à ma ri zinn mpìr, mpìr-à ma ri lir ji mpìr, mpìr-à ma ri sa àdòning, kwá kà fig mà byar-à Shìdun na sig kùrwá bàna.

¹¹ Wàrì níng mpìrká káhi áyauná ni rì sa sig àdòning tinn. Ama tàma-à níng Shìdun tu kífinn rìghing bu pyìrká á pìkyinn ná ni, n sinn kàng rìghing ning mpìrká buwá. I jir shinn swàm Shinn Luyí Yesu Kristi í bu-à sa ning shi sig ma kyinn òsàn àdòning, big jirà Awun Shìdun shi sig á kyinn ná ni.

Dìryí í Bu Shìdun

¹² Mpìr-à ma dinya shinnwá rag, “Bu-à mì ri zìm ñ sa níng, Shìdun kan òm fig bàna,” to, í barà hi. Ama bu-à wá sa níng, má swàb kà ya wu bu zyun rà? Kó barà bu-à mì ri zìm ñ sa níng, Shìdun kan òm fig bàna, ama ò zìm fig ñ sa bu-à má kàng fàu áni níng bàna.

¹³ Mpìr zyun ma dang rag buju í jir finn. Finn bó, í jir buju. Ama Shìdun má gban rìg big pyànà bidim pár. Ama Shìdun mà m fìg òryí jirà ayi sa àyái ma kàhi bàna. Ku mà m síg jirà ayi sa swàmwá áni. Dìryí shi sig í bu Shìdun, Shìdun bó, ku shí bu òryí.

¹⁴ Barà Shìdun gbar dù nann zu sig Shinn Luyí mà amir-à ni níng, í barà kwá gbar dù nann zu yi áni ma gbamwá.

¹⁵ Aning myàng. Dìryí shi sig í bu nzyun ma òr Kristi. To, ma sáshinn má zìg òr mí wà zyun-à í bu Yesu má na kwonn ma uwà àyái rà? Wàníng má sà òr fig bàna.

¹⁶ Kó ning yì fig bàna rà? Mpìr-à ma ri na ma uwà àyái, ku ma wàníng bìdìm pàr shi sig àrèg òr bá nzyun. Jir Shìdun dang sig rag, big pyànà bìdìm pàr big í bu nzyun.

¹⁷ Ama mpìr-à ma kwonn sig ma Shinn Luyí Kristi, ku ma wàníng shi sig áyau awun nzyun.

¹⁸ Barà òr yí shi sig í bu Shìdun níng, kada ayi sa àyái bàna. Bu-à bíbaiká zyun-à mpìr ma ri sa, ri sa bai fig òr wá bàna. Ama mpìr-à ma ri sa àyái, ku ri sa bai òr wá.

¹⁹ Asái, ning yì fig bàna rà? Òr ná í lu Awun Shìdun, ku shi sig á kyinn ná ni. I Shìdun ya síg ning nì Awunwá. Ning shi fíg shu shinn òr ná bàna, ning shi síg bu Shìdun.

²⁰ Ku wann sig ning ma àsà Yesu Kristi. Aning sa barà ná wib Shìdun ma òr ná.

7

Jír Ashinn Ban

¹ Tàma-à níng má dinya byann ning jír á shinn bu-à ning ba n bíb sig mì. Sà òr hing wà mpìr ma dang rag kwá zìg fig uwà bàna.

² Ama, á jir shinn àyái, sà òr hing mpìr aku zìg uwà, uwà tinn aku shi ma nù shinn òr wá.

³ Wunù ma zìg hing uwà, wà abann wàwá ma ri na ku, sànn hing wàwá aku sa tag kyinn nùwá. Wà uwà ma ri na abann nùwá, nùwá má aku sa tag kyinn wàwá.

⁴ Uwà bàna ma gbam áshinn òrúwá ni, sai nùwá. Wunù má, bàna ma gbam áshinn òrúwá ni, sai wàwá.

⁵ Kada aning kan òm bar òrúwá bu-à òrúwá ri zìm bàna. Sánn wà ná dang rag ná vig ma Shìdun mpyim. Wà na vig kinn rìghing, í wà aning kà rag swàmná, jirà kada Shaitan ma màg màg fig ning aning sa bu-à bibai, sai-à abann ma na ning.

⁶ Jír-à ò dang sig níng, í doka bàna. Mpìr-à ma ri zìm aku zìg uwà, sànn hing aku zìg.

⁷ Mì ri myàng sànn kab sig nì mpìr aku shi shu nùkyúnn àràng mì. Ama kó ni shi sig ma írì kyinn-à Shìdun ya sig ku. Káhi ri zìm shu nùkyúnn, káhi big ri zìm abig zìg uwà.

⁸ To, mì ri dinya ning, ning ká ning zìg fig ma uwà bàna, ma ningká ning zìg fig ma wunù bàna, ma uwà kíká, sànn hing aning shi shu átai àràng mì.

⁹ Ama mpìr-à ma yì hing rag kwá pànn yì sar fig shinnwá bàna, sànn hing aku zìg uwà, wà ku ma í uwà, sànn hing aku zìg wunù. Wà abann ma ri na wù wàni, sànn kab sig á sìn ban.

¹⁰ Ning mpìrká zìg sig uwà níng, ò shi sig ma doka zyun-à bi sig á byar Shinn Luyí. Doka-à hi ri dang rag, kada uwà aku gàb òrú ma nuwá bàna.

¹¹ Uwà-à ma gàb hing òrú ma nuwá, to, sánn aku shi átai, aku zìg rag wunù zyun bàna. Wà

ma nímá bàna, to, sái aku ma nùwá jùn kwonn kàng. Wunù aku kan zu wàwá bàna tinn.

¹² Ning mpìrká zìg sig uwà níng, ma dinya ning jír zyun, jír-à níng í mì mì rì dǎng nì. I jir Shinn Luyí Yesu Kristi bàna. Mpìr-à ma í bu Kristi, wà kwa shi sig ma uwà zyun-à í bu Kristi bàna, uwà-à níng hi ma ri zìm ku, kada aku kan zu wàníng bàna, abig shi shubá.

¹³ Uwà zyun-à ma í bu Kristi, wà kwá shi sig ma nùwá zyun-à í bu Kristi bàna, wà wunù-à hi ma ri zìm ku, kada aku zu tafinn nùwá bàna,

¹⁴ jir kai bàna wunù-à ri bàg fig Kristi bàna níng, á jir shinn wàwá ni kwá kàng mpìr-à Shìdun ri zìm. Uwà zyun-à ma ri bàg fig Kristi bàna, nùwá ma ri bàg í ni, á jir shinn nuwá ni kwá kàng mpìr-à Shìdun ri zìm. Nìm ma nímá bàna, yanká buná ning mà sig níng, big nìm má shi kà fig áyau mpìrká bu Shìdun ni bàna.

¹⁵ Mpìr-à ma ri bàg fig Yesu bàna, wà ku ma ri zìm aku gàb òr ma wàwá jirà wàníng ri bàg Kristi, to, aku gàb òr ma wàníng. Uwà-à ma ri zìm aku gàb òr ma nuwá jirà wàníng ri bàg Yesu, to, aku gàb òr ma wàníng, jir kai bàna Shìdun bar bi síg yi jirà ayi shi shu òsàn.

¹⁶ Ning uwàkà zyun-à í bu Kristi, ning yì fig bàna káhi nuná nìm má òg yonki àpyú á jir shinn ná ni. Ning wunùkà zyun-à í bu Kristi, ning yì fig bàna káhi wàná nìm má òg yonki àpyú á jir shinn ná ni.

A Shi Shuwú Aràg Barà Shìdun Sìnn Sig Wù á Shi

17 Kó ni bidìm pàr aku shi shuwá àràng barà Shinn Luyí sinn sig ku, ma barà Shìdun bar bi sig ku. Wàníng í doka-à mì ri tàg mpìrká ri bàg Kristi kó áni bidìm pàr.

18 Mpìr-à ma kyag fig jurwá bàna ma zìg hing jir Shìdun, kada aku kyag rag bàna. Mpìr-à ma kyag rìghing jurwá mpyim ma zìg síg jir Shìdun nì, kada aku dang rag ku kyag fig jurwá bàna,

19 jir kai bàna kó aku kyag, kó aku kyag bàna má, bàna ma yìr. Bu-à sànn sig bàna, mpìr aku wib jir Shìdun.

20 Kó ni aku shi shuwá àràng barà ku rì shi sig á sai-à Shìdun rì bar sig ku.

21 Wà mpìr rì ma shi síg shu fàu á sai-à Shìdun rì bar bi sig ku, kada aku kyab bu zyun bàna. Ama wà kwa dìg hing pyù barà kwá shi shu shinn òrúwá, aku shi.

22 Mì ri dang jír-à níng, jir kai bàna fàu-à Shìdun ma bar bi síg ku nì jirà aku bàg Shinn Luyí Yesu Kristi, ku zu rìg rag hing áyau fàuká nì, jir kai bàna ku kwonn rìghing shinnwá ma Shinn Luyí Yesu Kristi. Mpìr-à rì ma shi fig fàu á sai-à Shìdun bar bi sig ku bàna, tàma-à níng ku shi síg rag fàu Kristi.

23 Aning yì rag Yesu Kristi wann sig ning ma àsàwá jirà aning shí buwá. Kada aning kàng fàu mpìr jìkwìnn bàna.

24 Yiwaimí big, kó ni bidìm pàr aku shi á gbìb Shìdun nì, aku shi shuwá àràng bar sai-à ku rì shi sig, sai-à Shìdun bar sig ku.

Jír á Shinn Mpìrká Sír Fig Ma Ban Bàna Ma Uwà Kiká

25 Mì ri zìm í dinya byann ning jír áshinn mpìrká sìr fig ma ban bàna. Shinn Luyí dinya fig mì doka kó jír zyun áshinn jír-à níng ni bàna. N kyab síg nì jír-à níng á kyinnmí ni, í wà mì ri dǎng ni. Aning fig jírmí, jir kai bàna Shinn Luyí myàng ashimí, n fòr hing wà aning sìnn kyinn á jírmí ni.

26 Mì ri kyab, sànn kab síg nì uwà kó wunù aku shi shuwá átai, ma wà kwá sìr ban, jir kai bàna tàma-à níng shwìn nànn kab gbam.

27 Mpìr-à ma shi sig ma uwà, kada aku dang rag kwá kan zu rìg wàníng. Mpìr-à ma zìg fig ma uwà bàna, kada aku rag kwá zìg uwà.

28 Ama mpìr-à ma zìg rìghing uwà, ku sa fig bu pyìr bàna. Wùn uwà sáb ma zìg rìghing wunù, í bu pyìr bàna. Ama aning yì rag mpìrká ká sìr sig ban níng, bá wa shwìn nìnànn nímá. I bu-à sa n dang rag, sànn kab síg nì mpìr aku shi shu àtaiwá.

29 Yiwaimí big, yìr jír-à mì ri dang bàna í wàníng, su-à dà sig níng nonn fig bàna. Bu-à pànn sig tàma-à níng, mpìrká ká sìr sig ban níng, abig shi shubá àràg big sìr fig ban bàna.

30 Mpìrká ká ri kig mín, abig shi àràg big ri kig fig mín bàna. Ká ri fig àjwár, abig shi àràg big ri fig fig àjwár bàna. Ká ri wann buká, abig shi àràg big bàna ma bu.

31 Mpìr-à ma ri fig àjwár bu dunyaru, kada aku zìm àjwár-à níng zìg rìg kyinnwá bàna, jir kai bàna bu dunyaru má shi kinn fig bàna.

32 Bu-à mì ri zìm bàna, mì ri zìm aning shi shu àjwár, kada bu zyun aku sa shi ning bàna. Mpìr-

à ma zìg fig uwà bàna, kwá sa swàm Shìdun ma kyinn nìzyun jirà Shìdun aku fig àjwárwá.

³³ Ama mpìr-à ma zìg hing uwà, pìkyinnwá má kàng yag rìg á bu dunyaru, jir kai bàna ku ri zìm a wàwá fig àjwárwá.

³⁴ A byar-à níng hi pìkyinnwá gáb finn rìghing byar pyàná. Ama uwáká ká zìg fig wunù bàna, ma yann uwà sábká, big ri sinn pìkyinnbá á byar swàm Shìdun. Big ri zìm a kyinnbá ma òrìbá bidim pár aku shì í bu Shìdun. Ama uwà-à ma zìg rìghing wunù, pìkyinnwá ma yag rìg ma byar bu dunyaru, jir kai bàna ku ri zìm a nuwá fig àjwárwá.

³⁵ Mì ri dinya ning bu káníng, jirà nì sa shang ning. N zìm fig nì kan dim ning bu zyun bàna. Mì ri zìm aníng sa bu-à má sà̀n ya ning, ma barà ná ò̀g pyù-à má sa swàm Shìdun ma kyinn nìzyun.

³⁶ Wunù ma wùn uwà sáb ma ri zìm abig sìr ban, wà ba kyab kàng hing rag bá sìr fig ban bàna, ama ásim wunù-à hi ma kyab rag, sà̀n fig wà aku fim wùn uwà-à hi bàna, wà ku ma ri zìm abig sìr ban, to, abig sìr. Big ri sa fig bu-à bibai bàna.

³⁷ Wà mpìr ma kyab síg nì ma kyinnwá rag kwá zìg fig uwà sáb-à ku ri zìm níng bàna, wà ku ma ri pà̀nn shinnwá, kwa kyab síg nì ma kyinnwá, kàhi sà̀n hing wà kwa zìg fig uwà sáb-à hi bàna.

³⁸ Bu-à mì ri zìm nì dinya ning bàna í wà̀níng: mpìr-à ma zìg hing uwà sáb-à ku ri zìm níng, ku sa sig wà sà̀sà̀n, ama mpìr-à má zìg fig uwà bàna, sà̀n kab síg nì.

³⁹ Uwà-à má shi sig big wunù, ku bàna ma gbìb-à kwá gàb òr ma nùwá. Wà nuwá ma wu rìghing, wà kwa zìm hing í wà kwá zìg rag wunù zyun. Ama kada aku zìg wunù-à ri bàg fig Kristi bàna.

⁴⁰ Ama a myàngmí ni, mì ri myàng wà kwa zìg fig rag wunù zyun bàna, kwá fig káb nì àjwár. Bu-à ò kyab sig níng, mì ri kyab í Awun Shìdun tìya síg mì nì.

8

Jír á Shinn Bujú-à Big Ya Sig Bu Sìnn

¹ Ning bib mì jír á shinn buju zyun-à big zìnn sig bu sìnn áni. Ning bib mì rag ná jì rà kó ná jì fig bàna rà, àjìrà ò dinya ning.

Yi bidìm pàr, yì shi sig big yar. Ama yar ri du kà mpìr barà kwá gbar dù shinn. Ama azìm ri dang gbam pìkyinn mpìr.

² Mpìr-à ma rag, ku yì hing bu, ku yì byann fig ma barà sànsig aku yì bàna.

³ Mpìr-à ma ri zìm Shìdun, Shìdun yì rìghing ku.

⁴ To, jír á shinn buju-à big ya sig bu sìnn níng, yì yì hing wà bu sìnn kinn fig bu zyun á dunyaru bàna. Shìdun í àkúnn òzyun, zyun kim bàna.

⁵ Kó barà big ri dang rag bu sìnnká nìnnàn nímá shi sig mà waisháú-à ni ma wà á jìnn ni níng,

⁶ ama buyí yì yì sig íri Tayí Shìdun zyun-à màmm sig buká bidìm pàr. Ku màmm sig yì jìrà ayi shi mpìrká buwá. Shinn Luyí íri Yesu Kristi áwinwá

ni, zyun bàna. Shìdun mà̀m sig bu bidim pá̀r á byar Yesu ni. Yi ri shi shu á dò shinnwá ni tinn.

⁷ Ama mpìrká kádà áyauná ni, big yì byann fig bu-à níng bàna. Bigbá big nonn hing big ri kyab bu káníng. Hár tàma-à níng big ri myàng rag buju-à big zìnn sig bu sinn áni níng í bu bu sinn. Big ri kyab wà ba ji hing íri buju-à níng, má sa bai rìg big. Jir kai bàna pìkyinnbá gbam fig bàna.

⁸ Buju ji má gbar jùn kwonn fig yi ma Shìdun bàna. Wà ya ji kó wà ya ji fig bàna má, má swàb kà ya fig yi bu zyun bàna.

⁹ Bu-à sà̀n kab sig bàna, barà ning yì sig rag Shìdun kan dim fig íri buju-à níng bàna níng, kada aning sa mpìrká pìkyinnbá gbam fig bàna níng, abig ji ma abig kù kà á bu-à bibai bàna.

¹⁰ Wà mpìr-à pìkyinnwá gbam fig bàna níng, ma myàng wù zyun-à à yì rìghing bu níng, wù ma ri ji buju á lu bu sinn, wàníng má sa fig ku barà kwá ji buju-à big ya sig bu sinn bàna rà?

¹¹ Wà má àdòníng wù mpìr-à yì sig bu níng, wá sinn kà mpìr-à níng hi aku kù. Mpìr-à níng hi í wunzàwú, sáshinn wá sa bu-à má sinn kà ku aku kù barà Yesu wu sig dò shinnwá níng rà?

¹² Wà wa sa hing àdòníng, à sa sig Kristi bu-à bibai kwonn ma wunzàwú, barà à du kà sig wunzàwú sa sig bu-à ku ri kyab sà̀n fig bàna níng.

¹³ Jir wàníng, wà má ji buju-à má du kà wunzàmí aku kù, kàhi má ji fig rag buju-à hi bàna, jirà kada wunzàmí aku kù á jir shinnmí ni bàna.

9

Shu-à Wùn Aswam Kristi Má Shi

¹ Mì í mpìr-à má sa bu-à mì ri zìm. Mì í wùn aswam Yesu. N myàng hing Shinn Luyí ma zumí. Swàmmí ò sa ya sig Shinn Luyí níng, ning mpìrká mà Korinti ning shi síg nì mpìrká zyun-à mpìrká káhi má myàng àsàn swàmmí á byarná nì.

² Wà mpìrká ma ri dang rag, mì í wùn aswam Yesu bàna, ama buná, ning yì rìghing mì í wùn aswam Yesu àjai. Barà ning ri bàg Yesu níng, í bu-à má tiya mpìrká bá yì Yesu swam bi síg mì nì.

³ To, wàníng í barà mì ri dinya mpìrká áni wà ba ri zìm abig màg màg fig swàmmí:

⁴ Mì ri bib rag, àsái bumí ò fòr fig barà mpìrká mì ri sa ya big swàm níng, bá ya mì bu-à má ji ma bu-à má wa bàna rà?

⁵ Kó ò fòr fig barà má zìg uwà zyun áyau mpìrká ri bàg Yesu jirà aku shi wàmí, ma aku nu kyann mì á kyonnmí ni bàna rà? Ai, wàníng í barà yann aswamká bu Yesu kádà ri sa áni. Wunzàká bu Shinn Luyí Yesu big shi sig ma uwà tinn. Bitrus má, shi sig ma wàwá tinn.

⁶ Asai wato yi ma Barnabas, yi íri ká má sa swàm ma vùyí jirà ayi dig buju, ama yann aswamká kádà níng, abig sa swàm ma vùbá bàna rà?

⁷ Kó ning taba fig hing byar-à soja má wa bàì bujuwá ma bàì jàwá àjirà aku yag nu kànn rà? Bàna. To mpìr-à ma ri tàg bu á da, kwá ji fig awan buká ku tàg sig níng bàna rà? Ai kwá ji

sha. Kó mpìr-à ma ri za kyann bu apyagká, kwá wa fig myann bu apyagká bàna rà? Kwá wa sha.

⁸ Tò, jir soja-à níng, ma jir da-à níng, ma jir bu apyag za-à níng, mì ri zìg bi misali bar bu-à mpìr jíkwìnn má dìg áyau swàmwá ni. Tò, í barà shi sig áni áyau jir doka Shìdun ni tìnn.

⁹ Big ba sig rag, “Wà nai ma ri sa ya àsàin da-à swàm, kada aku sìr dim nu naiwá bàna.” Ayau jí-r-à níng ni, Shìdun ri dǎng nai rà?

¹⁰ Kó ku ri dǎng yi mpìr jíkwìnn rà? Ai, ku ri dǎng yi mpìr jíkwìnn. Jír-à hi ri tìya yi rag, sànn hìng mpìr-à ma nàm da, big mpìr-à ri gib za, abig sinn kyinn barà bá dìg, n má ji áni.

¹¹ Wà mpìr ma tàg hìng swai bu, ku ri zìm aku dìg zu kàng bu zyun áni. Barà yi tàg sig ning jir Shìdun níng, yá dìg zu kàng fig bu zyun á byarná ni bàna rà?

¹² Wà mpìrká ma ri dìg bu á byarná ni, sànn fig wà ayi dìg káb ni bàna rà?

Ama yi sànn kà fig pìkyinnyí ayi dìg bu á byarná ni bàna. Yi tìb sig pìkyinn, jir kai bàna yi zìm fig ayi sa bu-à má sànn kàng jir Yesu Kristi mà sim bàna.

¹³ Ning yì hìng mpìrká ri sa swàm á lu Shìdun ni ri dìg bujubá áyau buká mpìrká ri zìg kwonn yag màhàn. To, mpìrká ri twìb swànn ya Shìdun bu má, big ri dìg áyau wi-à big ri twìb swànn níng ni tìnn.

¹⁴ To, í barà Shinn Luyí dang sig áni rag, mpìrká ma ri sa swàmwá, n ma ri dinya kyann mpìrká jírwá, sànn sig mpìrká abig ya big bu-à big ri zìm.

15 Kó barà Shìdun dang rag abig ya mpìrká ri dang kyann jírwá bu-à big ri zìm níng, ama bumí ò vig fig ning bu bàna. Wasika-à mì ri ba ya ning níng, mì ri ba fíg jirà aning ya mì bu zyun bàna. Wà má vig ning bu, òdíká ò wu hing, jir kai bàna kada mpìr zyun aku dang rag ò vig sig ning bu á jir swàmmí ni bàna.

16 N kinn fig wà má gbar àshí á jir shinn swàmmí barà mì ri dang jir àjwár á shinn Yesu ni níng bàna. Swàm-à níng shi sig í dole í sa. Wà ma dang fig jir àjwár-à níng bàna, má fig fig àjwár bàna.

17 N nìm ma sìn kà síg shinnmí ò á swàm-à hi ni, big nìm má wa mì bàì áni. Ama mì ri sa fíg ma shinnmí bàna. Shìdun í àsàin-à sìn kà sig mì í sa swàm-à hi.

18 To, wà ma òig fig bàì swàmmí bàna, lada bu-à má òig áni í kai rà? Lada swàmmí shí ò àjwár-à mì ri fig wà ma ri dinya mpìrká jir Yesu átai, ò du kà fig big jirà abig wa mì bàì áni bàna.

19 Kó barà mì í fàu mpìr bàna níng, ama ò sìn kàng sig shinnmí àràg mì í fàu kó ni bidìm pár, jirà í gbar bi mpìrká nìnànn níma á byar Yesu.

20 Sai-à mì ri dinya mpìr Yahudawaká jir Shìdun níng, ò sìn kàng sig shinnmí àràg mì í mpìr Yahudawa, jirà í zìg bi big á byar Kristi. Sai-à ò dinya mpìrká ri bàg doka Musa, ò sìn kàng sig shinnmí àràg mì í mpìr-à ri bàg doka Musa, kó barà ò yì hing wà doka-à hi bàna ma gbam á shinnmí ni níng. N sa sig àdòning jirà í gbar bi pìkyinn mpìrká ri bàg doka, jirà í zìg bi big á byar Kristi.

²¹ Wàníng má, áyau mpìr Helenawaká ni, mì ri shi shumí àràng í big, mì ri bàg fig doka Musa bàna, jirà n̄ gbar bi pìkyinnbá á byar Yesu. Barà n̄ bàg fig doka Musa bàna níng, wàníng tàg fig rag, n̄ fim rìghing doka Shìdun bàna. Mì ri bàg doka Kristi.

²² To, áyau mpìrká bir sànn fig kyinn bàna, n̄ kàng rìg àràng big, jirà n̄ gbar bi big á byar Yesu. A byar mpìrká ni bidim pàr n̄ kàng rìg àràng big, jirà n̄ sa barà má gbar bi big á byar Yesu.

²³ Mì ri sa bu káníng bidim pàr á dò jir shinn jir àjwar Kristi, jirà n̄ dìg pyib sissàn áyau jir àjwár-à níng hi ni.

²⁴ Wà mpìr ma ri bàg Kristi, shi sig àràng barà big ri màg shàu. Wà ba ri màg shàu, mpìrká ninnànn nímá ri kà áni. Ama mpìr-à ma shàr kab sig, ku í àsàin-à má dìg bu á shàu-à hi ni. To, aning shàr shàu jirà aning ji.

²⁵ Mpìr-à ma ri zìm aku shàr yì shàu, kwá màg màg fig dìrwá, má pànn samyib shinnwá tinn. Big ri sa àdòníng mi ri dìg bu zyun-à má bai rìg. Ama yi ká yi ri bàg Yesu, yá dìg bu zyun-à má bai fig ábai bàna.

²⁶ Mì ri bàg fig Kristi átai àràng barà mpìrká ri shàr shàu átai níng bàna, mì ri kar ngang jirà Kristi aku fig àjwármí.

²⁷ Mì ri pànn samyib dìrmí jirà n̄ sa swàm áni. Mì ri pànn samyib shinnmí, àjirà wà ma dinya kinn hing mpìrká jir Shìdun, Shìdun má ngang fig mì bàna.

Kada Mpìr Aku Sa Buki Bàna

¹ To, wunzàmí big, mì ri zìm aning kyab pànn bu-à rì sa sig yàkúyí big ká rii bàg Musa. Shìdun kang sig big ma akwor. Big bidìm pàr, big wìm zu rìg áyau Zàn Gbàinshìn.

² Zàn-à níng ma akwor-à níng shi sig àrэг í àsàinká wau sig big d̀̀r batisma, big kàng rìg mpìrká bu Musa áyau-à ni.

³ Bujubá, big bidìm pàr big ri ji buju zyun-à Shìdun ri ya big níng.

⁴ Zàpìr má, big bidìm pàr, big ri wa zàpìr zyun-à Shìdun ri ya big. Zàpìr-à níng big d̀̀g sig áyau abàn zyun ni, abàn-à níng hi í Kristi. Kristi ri nu kyann hing big á byar-à big ri yag.

⁵ Ama bidìm pàr, Shìdun fig fig àjwár ma kádà nìnnàn nímá áyaubá ni bàna. Ku gban rìghing big mà awúnn-à ni. Kibá yam gáfinn rìghing áni awín awín.

⁶ Wàníng ri tàg yi rag kada ayi wìm bu-à bibai àrэг barà big rì wìm sig níng bàna.

⁷ Kada aning sa buki àrэг barà mpìrká kádà áyaubá ni rì sa sig níng bàna, àrэг barà big ba sig á tarkada Shìdun ni rag, “Mpìr káníng ji buju n wa bu-à má pyann big, hár n dù nann zu, n gbìb jau.”

⁸ Wàníng má, kada ayi sa àyái àrэг barà yàkúyí big rì sa sig níng bàna. Jir wàníng í bu-à sa mpìr dubu d̀̀zyun agban sara áyaubá ni rì wu rìghing í àyúnn ñzyun.

⁹ Kada ayi màg màg fig Shìdun ma bu bibaiká yi ri sa níng, àrэг barà mpìrká kádà áyaubá ni sa sig níng bàna. Barà big sa sig àdòníng, í wà bushùwíká bi zwàm gban rìg big.

¹⁰ Kada aning sa àràng barà mpìrká kádà rì sa sig, n kig bu-à big ri zìm, big díg fig bàna. Hár wùn aswam zyun-à ri gban ki níng, bi n gban rìg big á shinn bu-à níng ni.

¹¹ To, bu-à Shìdun sa sig big á shinn bu bibaiká big ri sa níng, ku ri tàg yi bu áni. I wà big ba sig á tarkada Shìdun jir shinnyí, jirà ayi myàng yì bu-à ku ri zìm fig wà ayi sa bàna, jir kai bàna tàma-à níng barà yi shi sig á dunyaru níng, dunyaru ri nyàan vinn.

¹² Jir wàníng wà wù ma ri kyab rag buwú à sar gbam hing á gbìb Shìdun, sái á pànn samyib shinnwú jirà kada á kù bàna.

¹³ Buká ri màg màg fig ning bidìm pàr, í buká ri màg màg fig kó ni bidìm pàr á dunyaru. Shìdun í mpìr gwangga, kwá fim fig ning bu aku màg màg fig ning wà má kab gbamná bàna. Sai-à bu ma màg màg fig ning, kwá ya ning gbam barà ná tib wann pìkyinn, kwá sa gbìb-à ná zu áni.

¹⁴ Wunzàmí big, jir wàníng, kada aning sa buki bàna.

¹⁵ Ning í mpìr yar big. Aning kyab bu-à mì ri dinya ning níng, sànn hing rà, kó sànn fig bàna rà?

¹⁶ Aning myàng. Sai-à yi ri ji buju wà kyab pànn Shinn Luyí áni, wùn kwài zyun-à yi ri yan Shìdun mà kàhi, wà yi ri wa áni níng, yi ri kwonn shinn ma àsà Yesu Kristi. Brodi-à yi ri ngir gáfinn mi ri ji níng, shi sig àràng yi ri kwonn shinn ma òr Yesu Kristi.

¹⁷ Brodi-à níng í akúnn ñzyun, yi mpìr nìnànn nímá yi ri ji. I barà yi shi sig í òr ñzyun á byar Yesu Kristi ni tinn.

18 Aning myàng bu-à mpìr Israilaká rì sa sig. Sai-à ba ri twìb swànn ya Shìdun wi, big ri zwam. Barà big ri zwam wi-à níng shi sig àràg big ri kwonn shinnbá ma Shìdun.

19 Mì ri dinya fig ning rag, bu sinn kó bu-à big ri gib gban ya bu sinn, kinn hing bu zyun bàna.

20 Ama yìr jír-à mì ri dinya ning í wàníng: Bu-à mpìrká ri gib gban ya bu sinn níng, big ri ya fig Shìdun bàna, big ri gib gban yá wàuká. N zìm fig aning kwonn shinn ma wàu bàna.

21 Wà na wa hing bu á wùn kwài Shinn Luyí ni, ná wa sar fig wà á wùn kwài wàuká ni bàna. Wà na ji hing brodi bu Shinn Luyí, kada aning ji bu wàuká bàna.

22 Yi ri zìm ayi sa bai kyinn Shìdun rà? Yi kab sig ku ma gbam rà?

23 Mpìrká káhi ri dang rag, bu-à ba sa bidim pár íri bu-à òsàn. Ama bu bidim pár íri bu-à òsàn bàna. Bu bidim pár íri wà ri sa tag pìkyinn bàna.

24 Kada mpìr aku kyab íri bu-à má sànn ya shinnwá bàna. Ama aku kyab jàuwá tinn.

25 Wà na ri zìm aning wann zwam wi-à big ri wann tafinn mà fir ati-à ni, to aning zwam, kada aning bib bàna, jirà kada aning kyab á kyinn ná ni rag shìshàr,

26 jir kai bàna big ba sig rag, “Dunyaruru ma buká shi sig áni bidim pár, í bu Shìdun.”

27 Wà mpìr-à ma ri bàg fig Yesu bàna ma bar ning rag, aning ji buju ma ku, wà na zìm hing, aning yag ji, ama kada aning bib rag wàníng í bu shìshàr rà, bàna.

²⁸ Ama wà mpìr zyun ma dinya ning rag buju-à níng big ya sig bu sinn, to, kada aning ji bàna, aning fim jir shinn mpìr-à dinya sig ning níng, kada aku kyab jír á kyinnwá ni bàna.

²⁹ Aning fim buju-à níng hi, ná wai í jirà ning ri kyab á kyinn ná ni rag bai bàna, ama aning fim jir shinn barà mpìr-à níng dinya sig ning rag bai níng, jirà kada aku kyab jír bàna.

Mpìr zyun má dang rag, “Bu-à sa má fim buju-à níng hi á jir shinn bu-à jàumí ri kyab í jir kai rà?”

³⁰ Wà ma sa ya hing Shìdun ísoko á shinn buju-à níng hi, bu-à sa mpìr zyun má dang bai mì, í jir kai rà?”

³¹ Bu-à ná ji, ma bu-à ná wa, ma bu-à ná sa bidim pár, aning wib Shìdun áni.

³² Aning shi shu barà ná sa mpìrká má kù fig bàna, kó Yahudawaká, kó mpìrká í Yahudawaká bàna, kó mpìrká ri bàg Yesu. Kada aning du kà big á gbìb zyun-à bá kù áni bàna.

³³ Aning sa àràg barà mì ri sa níng. Bu-à ma sa bidim pár, mì ri zìm kó ni aku fig àjwár ma kàhi, mì ri kyab fig bu-à má sàni ya mì awínmí ni bàna. Mì ri sa bu-à má sàni ya kó ni, jirà aku wim zu.

11

¹ Aning bàg shumí àràg barà mì ri bàg shu Kristi níng.

Uwàkà Abig Bir Dim Shinnbá Sai-à Mpìrká Ma ri Kwonn Shinn Ma Ri Wib Shìdun

² Mì ri yan ning barà níng ri kyab pànn kyann mì, mì ri bàg buká n tåg sig ning níng.

³ Mì ri zìm aning yì rag mpìr-à shi sig shinn wunùkà í Kristi. Wunùkà shí nì shinn uwàkà. Mpìr-à shi sig shinn Kristi bó, í Shìdun.

⁴ Wà wunù ma ri vig Shìdun áyau bìr mpìrká ni, kó wà kwa ri dang jir Shìdun, ma bir sig abishinn á shinnwá ni, ku ri sa Shinn Luwá Kristi yawari.

⁵ Uwà ma ri vig Shìdun kó wà kwa ri dinya mpìrká jir Shìdun, ma bir dim fig bu á shinnwá ni bàna, ku ri sa nùwá yawari. Má shi àràg ku wann kìfinn sig jinnwá.

⁶ To, wà kwa bir dim fig bu á shinnwá ni bàna, òdíká aku wann kìfinn rìg jinnwá. Wà kwa myàng rag í bu zunái wà kwá wann jinnwá, òdíká aku bir dim shinnwá.

⁷ Kada wunù aku bir dim shinnwá bàna, jir kai bàna Shìdun mà̀m sig wunù àràg í ku. Wunù ri tàg gbam Shìdun á ò̀r̀wá ni. Uwà bó, ku ri tàg gbam wunù.

⁸ Shìdun mà̀m zu fig wunù á ò̀r̀r̀ uwà bàna, ama ku mà̀m zu sig uwà á ò̀r̀r̀ wunù.

⁹ Ku mà̀m fig wunù jir shinn uwà bàna, ama ku mà̀m sig uwà jir shinn wunù.

¹⁰ Wàníng í bu-à sa sà̀n sig uwà aku bir dim shinnwá. Wàníng ri tàg ku ri wib nuwá. Wà kwa sa hing à̀dò̀níng, yann aswamká bu Shìdun mà̀ wai má fig à̀jwár.

¹¹ Yi zyun-à yì ri bàg Shinn Luyí Yesu níng, yì yì hing wà uwà nì̀m ma bàna, wunù nì̀m bàna. Wunù nì̀m ma bàna, uwà nì̀m bàna tìnn,

¹² jir kai bàna Shìdun mà̀m zu sig uwà á ò̀r̀r̀ wunù, ama bidì̀m pá̀r, uwà ri mà̀ wunù. Shìdun bó, ku shí nì̀ byar-à kó kai bidì̀m ri zu bi.

13 To, aning myàng. Sànn hing uwà aku vig Shìdun, wà kwa bir òim fig bu á shinnwá ni bàna rà?

14 A myàngná ni, wà jinn wunù ma lor hing wàni í bu zunái bàna rà?

15 Ama uwà wà jinnwá ma lor hing, shwar sig ku wàni. Jinnwá shi sig àràg í bu-à bir á shinn.

16 Mpìr-à ma zìm fig jírímí níng bàna, to, ò bàna ma jír zyun. Kó mpìrká ri bàg Yesu má, big bàna ma jír zyun tinn. Yi ma big ri wib Shìdun í gbìb òzyun.

Jir Buju-à Big Ri Kyab Pànn Yesu Ani

17 N shi sig ma jír zyun-à má tàg ning. N fig big rag sai-à ning ma ri kwonn í byar òzyun ma ri wib Shìdun, wà barà ning nìm má sa bu òsàn níng, ning ri sa sòr bu bibai. A jir bu-à níng ni, í bu-à sa má yan fig ning bàna.

18 N fig big dinya mì rag sai-à na kwonn hing shinn, ning ri kyàb gàfìnn áni kyau kyau. Mì ri myàng jír-à hi í àjai.

19 Níng ri kyàb gàfìnn jirà mpìrká abig yì ká shi sig ma gwangga áyauná ni rà? Bu-à níng ri sa sànn fig bàna.

20 Sai-à ning ma ri kwonn shinn barà ná ji buju zyun-à ning ri kyab pànn Yesu áni, ning ri ji fig àràg barà sànn sig aníng ji níng, bàna.

21 Bu-à sa ò dang àdòníng, jir kai bàna káhi ri ji zìr bujubá, ama káhi amor ri gban big, káhi ri wa pyann.

22 Níng bàna ma lu byar-à ná ji buju, má wa shin màhàn rà? Bu-à sa níng ri sa àdòníng, ning ri zìm aning sa mpìrká ri bàg Kristi yawari rà?

Ning ri zìm aning sa pànn mpìr ashiká zunái rà?
Barà ning ri sa àdòníng, má yan fig ning bàna.

²³ Bu-à mì ri tàg ning á shinn buju-à ning ri
ji níng, í bu-à Shinn Luyí tàg sig mì. A fi-à bá
wann tafinn Yesu áni níng, ku zìg brodi àkunn
zyun,

²⁴ n sa Shìdun ísoko, n ngir sann gàfínn áni, n
ya yann sukàwá big, n dang rag, “Brodi-à níng
shi sig àràg í òdòmí zyun-à má ya á dò shinn ná
ni. Aning sa kyann àdòníng barà ná kyab pànn
kyann mì áni.”

²⁵ To, barà big ji kinn brodi-à hi àdòníng, sái
ku bi zìg wùn kwài zyun n rag, “Zàn-à níng shi
sig àràg í àsámí zyun-à má zìg zu ning áyau bu
pyìrná ni. Asámí ri tàg rag Shìdun má sa bu àpyú
zyun-à ku gib sig nu rag kwá sa níng. Sai-à ning
ma ri sa àdòníng, aning kyab pànn kyann mì
áni.”

²⁶ Sai-à ning ma ri ji brodi-à níng, ma ri wa
zàn-à á wùn kwài-à níng ni, ning ri tìya mpìrká
barà Shinn Luyí Yesu wu sig á jir shinn ná ni, hár
àyúnn-à kwa kàng bi hing.

²⁷ To, mpìr-à ma ji hing brodi-à níng, ma wa
hing zàn-à níng á gbìb-à sànn fig bàna, ku ri sa yá
dìr Yesu ma àsà wàníng bu pyìr.

²⁸ Mpìr-à ma ri zìm aku ji brodi-à níng kwonn
ma zàn-à níng, aku màg byann ma òdómí, í wà
aku zìg brodi-à níng, aku ji ma aku wa zàn-à
níng.

²⁹ Mpìr-à ma ji hing brodi-à níng, ma wa hing
zàn-à níng, wà kwa kyab fig dìr Yesu bàna, ku
ri gbar bi yá shinnwá kwonn-à Shìdun má wà
níng.

³⁰ Wàníng í bu-à sa mpìrká káhi áyau ná ni nìnànn nímá òrìbá lìlìb, káhi òrìbá rì wa, káhi wu rìghing.

³¹ Wà ya màg byann hing òrìyí rípyim, ma ri ji íni, Shìdun má wà fig yi kwonn bàna.

³² Wà Shìdun ma du kà yi á shwìn, ku ri tàg yi rag, ayi fim bu-à bibai sa, jirà kada ayi kà á kwonn-à kwá wà mpìrká kádà á dunyaru níng bàna.

³³ Jir wàníng sai-à na kwonn hing shinn barà ná ji buju zyun-à ná kyab pànn Yesu áni, aning shi kir jàuná, jirà aning ma big ji ábìr-à ni.

³⁴ Wà mpìr-à amor ma ri gban ku, aku shi aku ji ma bujuwá mà luwá ni, í wà aku bi í ni, jirà kada aku gbar bi ya shinnwá kwonn wà bàna. Jírká wà dà níng, sai-à ma bi hing í wà má dǎng ni.

12

Gbam-à Awun Shìdun Ri Ya Yi

¹ Ning wunzámí big, mì ri zìm n dinya ning jír á shinn barà Awun Shìdun ri ya mpìrká gbam abig sa yì swàm Shìdun, mì ri zìm aning yì barà shi sig áni.

² Ning yì hing sai-à ning kà fig ma á gbìb Kristi bàna, big ri tonn gban ning, mi ri gbar kyinn ná, ning ri wìb bukiká zyun-à bàna ma yonki níng.

³ Jir wàníng mì ri dinya ning mpìr-à ma ri dang jír ma Awun Shìdun, kwá dang fig rag, “Shìdun màg gban hing Yesu” bàna. Walako mpìr-à ma dang rag, Yesu í Shinn Luwá, sái wà Awun Shìdun ma tìya hing ku.

⁴ To, yar-à Awun Shìdun ri ya mpìrká barà bá sa swàm áni, shi sig kim kim. Ama Awun Shìdun àsàin-à ri ya yar káníng, ku í nzyun.

⁵ Swàm buká yá sa ya Shìdun shi sig áni kim kim. Ama Shinn Luyí àsàin-à yi ri sa ya ku swàm-à níng í nzyun.

⁶ Gbìb barà mpìrká má sa swàm Shìdun shi sig áni kim kim. Ama bidìm pàr, í Shìdun nzyun ya sig nì kó ni gbìb káníng.

⁷ Awun Shìdun ri tìya kó ni bu-à kwá sa jirà kó ni aku sa shang jàuwá ma kàhi.

⁸ Awun Shìdun ri ya mpìr zyun yar barà kwá dang jir Shìdun. Awun Shìdun ri ya mpìr zyun aku tàg yì byann jír òzwàunká bu Shìdun.

⁹ Awun Shìdun ri ya mpìr zyun pìkyinn bir barà kwá sa bu ùwài. Awun-à níng hì ri ya mpìr zyun gbam barà wàníng má dàb gbam mpìr.

¹⁰ Awun Shìdun ri ya mpìr zyun gbam aku sa swàm bu mamaki. Ku ri ya mpìr zyun gbam barà wàníng má dang yì jir Shìdun. Ku ri ya mpìr zyun gbam barà wàníng má gáfinn swàm Awun Shìdun, ma swàm wàu. Ku ri ya mpìr zyun gbam barà wàníng má dang yì nu jír kim kim. Ku ri ya mpìr zyun gbam barà wàníng má dang vim bìr nu jírká.

¹¹ Awun Shìdun nzyun í àsàin-à ri ya gbam káníng bidìm pàr. Ku ri ya kó ni bidìm pàr bu-à ku ri zìm a wàníng sa yì.

Mpìrká Bu Kristi Shi Sig Ayau Dìr Nzyun

¹² Yi shi sig ma dìr nzyun ama buká shi sig áni kim kim. Kó barà buká shi sig áni kim kim níng,

ama í òr ñzyun-à níng hi. To, í barà yi shi sig áni á òr Kristi ni.

¹³ Wàníng má, í barà shi sig áni, mpìr Yahu-dawaká ma mpìrká zyun-à í Yahudawaká bàna, mpìrká zyun-à í fàu ma ká zyun-à í fàu bàna, yi bidim pàr Awun zyun-à Shìdun wau sig yi òr batisma ma kàhi níng, í Awun ñzyun jirà ayi shi bu ñzyun. Awun ñzyun-à níng hi, í wà zyun-à Shìdun ya sig yi.

¹⁴ Òr í ñzyun, ama buká shi sig áni kim kim.

¹⁵ Wà bar nìm ma dang rag, “Bumí mì í vù bàna, ò shi fig áyau òr bàna.” Kó ku nìm ma dang àdòníng, ama bidim pàr ku shi sig áyau òr-à ni.

¹⁶ Kó sung nìm ma dang rag, “Bumí mì í zu bàna, ò shi fig áyau òr-à ni bàna.” Ama bidim pàr ku shi sig áyau òr-à ni.

¹⁷ Wà òr nìm ma íri zu, ku nìm má fig jír á shinn rà? Kó nìm ma íri sung, ku nìm má fig swinn bu á shinn rà?

¹⁸ Ama Shìdun sinn sig buká kim kim áyau òr àràg barà ku ri zìm.

¹⁹ Bu-à áyau òr nìm ma í bu ñzyun, òr nìm má shi rag áni rà?

²⁰ Kyau bu nìnànn ní má shi sig áyau òr, ama òr í ñzyun-à níng hi.

²¹ Zu má dinya sar fig vù rag, “Bumí bu-à du mì ma wù bàna.” Shinn má dinya sar fig bar rag, “Bumí bu-à du mì ma wù bàna tinn.”

²² Buká zyun-à yi ri myàng rag big bàna ma gbam áyau òr, wà big nìm ma bàna, òr nìm bàna.

²³ Ayau òrìyí ni, buká yi ri myàng kinn fig bu bàna níng, kab sig buká kádà áyau òrìyí ni. Buká yi ri zìm fig mpìrká abig myàng bàna níng, í buká yi ri myàng kwonn ma kàhi wàni.

²⁴ Buká yi ri zìm a mpìrká myàng ma zu níng, yi ri myàng kwonn fig ma kàhi bàna. Shìdun sìnn sig kyau buká yi ri myàng kinn fig bu bàna á òrìyí ni níng jirà ayi wib big.

²⁵ Shìdun sa sig àdòníng, jirà kada á òrìyí gàfìnn bàna. Ku ri zìm a kyau buká á òrìyí ni abig myàng kwonn ma bar òrìbá.

²⁶ Zyun áyau-à ni ma wa hing shwìn, kádà má wa shwìn tinn. Wà ba yan hing zyun, kádà má fig àjwár tinn.

²⁷ Ning bidìm pàr, ning shi sig òrì Kristi. Kó ni bidìm pàr shi sig í kyau áyau òrì Kristi ni.

²⁸ Ayau mpìrká ri bàg Kristi, Shìdun sìnn ya sig kó ni swàm-à kwá sa. Wà wa zyun, ku sìnn kà sig káhi abig shi yann aswam, wà wa pyàná í ká ri dang kyann jir Shìdun. Wà wa sara, í ká ri tàg jìrwá. Asim káníng ni, ku ya sig káhi gbam barà bá sa bu mamaki, káhi ku ya sig big gbam barà bá dàb gbam mpìr dor. Ku ya sig káhi gbam barà bá sa shang mpìr. Káhi ku ya sig big gbam barà bá pànn kwonn samyib mpìrká. Ku ya sig káhi gbam barà bá dang nu jír kim kim.

²⁹ Yi bidìm pàr, yi íri yann aswam bàna. Yi bidìm pàr, yi íri mpìrká ri dang kyann jir Shìdun bàna. Yi bidìm pàr yi íri mpìrká ri tàg jir Shìdun bàna. Yi bidìm pàr, yi íri mpìrká ri sa bu mamaki bàna.

³⁰ Yi bidìm pàr yi íri mpìrká ri dàb gbam mpìr bàna. Yi bidìm pàr, yi íri mpìrká ri dang nu jír

kim kim bàna. Yi bidim pàr, yi íri mpìrká ri dang vim bìr nu jír bàna.

³¹ Kó ni aku sinn pìkyinn rag, Awun Shìdun aku ya ku gbam barà kwá sa bu-à kab sig bu káníng.

Ama má tìya ning gbìb zyun-à sànn kab sig bu káníng bidim pàr.

13

Azìm Kab Síg Nì Bu Káníng

¹ Wà ma dang yì hing nu jír kim kim, kó nu jir yann aswamká bu Shìdun mà wai, ama wà ma zìm fig jàumí zyun bàna, nu jírmí mì ri dang níng, bàna ma yìr, jírmí shi sig àràg mì ri mìb jag àsháu.

² Wà ma dang yì hing jir Shìdun, ma yì byann rìghing buká Shìdun sa sig wà mpìr má yì fig bàna, hár ma myàng yì rìghing buká nìnnànn nímá, ama wà ma zìm fig jàumí zyun bàna, ò fòr fig bu bàna. Wà ma shi sig ma pìkyinn bir barà má dinya shinnkwìnn rag aku dù, kwá dù, ama ma bàna ma azìm á kyinnmí ni, ò fòr fig bu zyun bàna.

³ Wà ma zìg buká ò shi sig ma kàhi, ma ya vinn rìg mpìr ashiká, kó wà ma rag, abig zìg òirmí abig twìb swànn rìg, ama wà ma bàna ma azìm á kyinnmí ni, má òìg fig bu zyun bàna.

⁴ Aning myàng bu-à azìm ri tàg. Mpìr ma shi sig ma azìm á kyinnwá ni, kwá sa muyar wàni. Kwá shi ma pìkyinn òsàn. Kwá sa fig akyib bàna, kwá gbar fig àshí bàna, kwá gbar dù fig shinn bàna tinn.

⁵ Mpìr-à ma shi sig ma azìm kwá gbam fig sung bàna. Kwá zìm fig ìri shinnwá bàna. Kwá nànn fig mpìr àgùnn bàna. Kwá pànn fig mpìr á kyinn bàna.

⁶ Kwá fig fig àjwár ma bu bibaiká mpìrká ri sa bàna. Ama kwá fig àjwár ma bu òsàn.

⁷ Kwá sa pyann kàng fig bu-à mpìr ma sa ku bàna. Kwá bìr pìkyinn á byar Shìdun. Kwá sìn pìkyinn rag jàuwá má sa bu-à òsàn. Bu-à ma dìg ku bidìm pàr, kwá tib wann pìkyinn.

⁸ Azìm má shi hár kinn kinn, má vinn fig ávinn bàna. Mpìr-à ma dang yì hing jir Shìdun, jír wá ku dang yì sig níng má wam zu rìg. Mpìr-à ma dang yì nu jír kim kim, nu jír káníng má wam zu rìg tinn. Bu-à mpìr ma yì sig bidìm pàr, má wam zu rìg,

⁹ jir kai bàna bu-à yì yì sig tàma-à níng, yì yì kinn fig bàna. Jir Shìdun-à yì ri dang níng, yì yì kinn fig bàna tinn.

¹⁰ Ayúnn-à Shìdun má tiya hing yi buká bidìm pàr, ká yì yì vinn fig bàna níng, yá yì rìg.

¹¹ Sai-à mì í wùnshái, mì ri sa bu àràng í wùnshái. Jírmí mì ri dang í jir wùnshái. Mì ri kyab jír àràng wùnshái. Sai-à ò bi wài kinn rìghing, ò dà finn rìghing kyinn wùnshái-à níng.

¹² To, bu-à yì yì sig tàma-à níng, yì yì byann fig bidìm pàr bàna, jir kai bàna shi sig àràng yi ri myàng kà zuyí adìn zyun-à kyàr fig bàna. Ama á pyànn níng, yá myàng zu ma zu. Tàma-à níng ò yì sig bu áwai áwai. Sáí á pyànná-à níng, í wà má yì byann bu bidìm àràng barà Shìdun yì sig kyinnyí.

¹³ Bu sara káníng má shi kinn kinn: pìkyinn bir, ma kyinn sìnn, ma azìm. Ayau bu sara káníng ni zyun-à kab sig bàna, í azìm.

14

Gbam Buká Ayau Mpìrká Ri Bàg Yesu

¹ Aning zìm jàuná big, ma aning sìnn kyinn ná á gbam buká Awun Shìdun ri ya jir swàm Shìdun. Bu-à kab sig áyau bu káníng ni í jir Shìdun dang kyann.

² Wà mpìr ma dang hing nu jír zyun kim, zyun-à ku shwann fig bàna, ku ri dinya fig mpìr bàna, ku ri dinya Shìdun. I Awun Shìdun ri tìya ku jír wá í ni, ama á byar mpìrká shi sig í jir atàm.

³ Ama mpìr-à ma dang kyann jir Shìdun, kàhi mpìr má fig yì, kwá sa shang big, kwá dang gbam big kyinn, kwá ya big àjwár.

⁴ Mpìr-à ma dang nu jír zyun kim, ku ri dinya kàng shinnwá ku áwinwá ni. Ama mpìr-à ma ri dang kyann jir Shìdun, ku ri sa shang mpìrká bu Yesu bìdìm pár.

⁵ Mì ri zìm aning díg yar barà ná dang yì nu jír kim kim. Ama bu-à ò zìm kab sig bàna, mì ri zìm aning dang kyann jir Shìdun. Mpìr-à ma ri dang kyann jir Shìdun, ku kab síg nì mpìr-à ri dang nu jír kim kim, jir kai bàna bu-à mpìr zyun-à ri dang nu jír kim kim níng ma dang sig, sái wà mpìr zyun ma dang vim bìr hing, í wà mpìrká má shwann yì bu zyun áni.

⁶ Wà ma bi á byarná ni ma dinya ning jír ma nu jír zyun kim, wà zyun-à ning fig yì fig bàna, jír-à ò dang sig níng má sa shang ning rà? Bàna.

Sái wà ò ma ri dinya ning bu-à Shìdun tàg sig mì, kó ò ma ri dinya ning jir yar, kó ò ma ri dinya ning jir Shìdun, kó ò ma ri tàg ning jir Shìdun, wàníng í bu-à má sa shang ning.

⁷ Bu káníng mì ri zìg bi ya ning misali áshinn buká bàna ma yonki, àràg shàm, kó garya, wà nàibá ma zu kyàr fig bàna, mpìrká má fig yì yìr jonn-à rà? Bá fig yì fig bàna.

⁸ Wà sojaká ma winn zu kyàr fig yur bàna, jàubá má dù nann zu abig sîr gbam òr jir kànn nu rà? Bá sa fig bàna.

⁹ To, wàníng í barà shi sig áni tìnn, wà na dang jír ma nu jír zyun-à mpìrká fig yì fig bàna, sáshinn bá fig yì yìr bu-à ning ri dang rà? Wà ba fig yì fig bu-à ning ri dang bàna, jír-à níng má shi àràg ning ri dang wìr kà á zàpìr.

¹⁰ Ning yì hing áyau dunyaru, nu jír shi sig áni nìnànn nímá, ama bidim pár big shi sig ma yìr.

¹¹ Ama mpìr-à ma dang nu jír zyun-à ò fig yì fig bàna, ku shi síg kyìnn á byarmí ni, mì bó ò shi síg kyìnn á byarwá ni tìnn.

¹² To, barà ning ri sa àtùtwài jirà aning òg bu-à Awun Shìdun ri ya níng, aning yàn nu jír zyun átai bàna, aning yàn kab bu-à má tàg mpìrká bu Yesu bu á kyinnbá ni, jirà abig bir swàb kà pìkyinnbá.

¹³ Wà mpìr-à ma ri dang nu jír zyun kim, aku vig Shìdun rag a wàníng tìya ku yìr bu-à ku ri dang níng, àjirà aku dinya mpìrká.

¹⁴ Wà ma ri vig Shìdun ma nu jír zyun kim, í adìnmí ri víg nì, kyinnmí yì fig bu-à mì ri dang bàna.

¹⁵ To, ń sa áshinn rà? Sànn hìng ń vig Shìdun ma kyinnmí ni ma adìnmí bidìm pàr. Má dàì swàm yan Shìdun ma adìnmí kwonn ma kyinnmí tinn.

¹⁶ Wà wù ma ri swam yan Shìdun ma nu jír zyun kim, jàuwú zyun-à yì fig bàna níng, kwá sáshinn má zìm rag “aku shi àdòníng” rà?

¹⁷ Kó wù ma ri yan Shìdun òsàn nímá ma nu jír-à hi, ama jàuwú má fig yì fig yìr bu-à wù ri dang bàna.

¹⁸ Mì ri sa Shìdun ísoko barà ò dang kab ning nu jír kim kim níng.

¹⁹ Ama áyau bìr mpìrká bu Yesu ni, ò zìm kab sig ń dang jír àkunn swana, jirà abig yì byann bu-à mì ri dang, ma wà má dang jír nìnnàn nímá ma nu jír zyun kim, mpìrká má fig yì fig bu-à mì ri dang bàna.

²⁰ Aning kyab jír sísàn nímá. Kada kyinn ná aku shi àràg yann wùnshái bàna. Sáì wà má í bu-à bibai, í wà aning sìn kàng shinn ná àràg ning í yann wùnshái. Ama buká kádà níng, kada aning shi àràg ning í yann wùnshái bàna.

²¹ Aning myàng. Big ba sig á tarkada Shìdun, big rag,

“Mì Shìdun, má zìg mpìrká ri dang nu jír kim kim,
jirà abig dinya mpìrká bumí jírmí, ma nu kim kim.

I kyinnká má dinya mpìrká bumí jírmí í nì.

Ama bidìm pàr bá gbam sung, má fig fig jírmí bàna.”

²² To, wà mpìr Kristi zyun ma ri dang nu jír zyun kim, ku ri dang àjirà jír-à hi aku tiya mpìrká ká bàg fig Yesu bàna, gbam Shìdun. Kù ri dang fig

jirà aku tàg mpìrká ri bàg Yesu bàna. Ama wà ku ma ri dang jir Shìdun, ku ri dang jirà mpìrká ri bàg Yesu abig fig byann bu áni.

²³ Wà ningká ning ri bàg Yesu na kwonn shi sig í byar nzyun barà ná wib Shìdun, wà ning bidìm pàr, ning ma ri dang nu jír kim kim, mpìr zyun-à fig fig jir Yesu bàna, kó mpìr zyun-à ri bàg fig Yesu bàna, wà kwa myàng barà ning ri sa àdòning, kwá rag í òsàng ri sá ning nì.

²⁴ Ama wà kwa kà, ma fig na ri dang jir Shìdun barà kwá fig byann, jír-à hi má vim bìr pìkyinnwá, hár má tiya ku bu-à bibai-à ku sa sig.

²⁵ Bu bibai-à ku ri kyab á kyinnwá ni níng, kwá dang zu rìg á myann, kwá fim bu bibai-à ku ri kyab á kyinnwá ni. Kwá binn kir wann á jìnn ni, má wib Shìdun. Kwá dang rag Shìdun shi sig áyauná ni àjai.

Mpìrká Ri Bàg Yesu Abig Sa Bu Abibir

²⁶ To, wunzámí big, shinn jírímí níng, sai-à na kwonn hing í byar nzyun barà ná wib Shìdun, kó ni shi sig ma bu-à kwá sa. Mpìr zyun má dàì jonn. Mpìr zyun má tàg jir Shìdun. Mpìr zyun má dang bu-à Shìdun tiya sig ku. Mpìr zyun má dang nu jír zyun kim, jàuwá zyun má dang vim bìr yìr bu-à ku ri dang. Aning sa bu káníng bidìm pàr ábibir barà má sa gbam pìkyinn mpìrká ri bàg Yesu.

²⁷ Mpìrká ma dang nu jír zyun kim, to, kada abig wam zu mpìr pyànà kó sara, ma abig dāng ni bàna. Zyun ma ri dang, a zyun shi ma akim, í wà a mpìr zyun dang vim bìr nu jír-à hi. Big bidìm pàr abig sa yà zu rìg àdòning.

28 Wà mpìr zyun-à má dinya byann ning yìr jír-à hi ma bàna áni, mpìr-à ri dang nu jír zyun kim níng, aku pànn shi akim, ma aku dang á kyinnwá ni, ku ma Shìdun mpyànà.

29 To, mpìr pyànà kó sara abig dang jir Shìdun. Mpìrká dà níng abig fig byann bu-à mpìr sara káníng ri dang níng, wà ma í jir àjai.

30 Mpìr-à ma ri dang jir Shìdun, wà Shìdun ma tiya híng mpìr zyun bu àpyú, to zyun-à ri dang jír wá níng aku pànn shi ma akim.

31 Ning bidim pár, aning dang jir Shìdun zyun, zyun, zyun, jirà kó ni aku fig ma aku shwann bu áni, ma àjirà a jír-à hi gbar gbam ku pìkyinn.

32 Mpìr-à Shìdun ma ya sig ku gbam barà kwá dang jir Shìdun, ku shi sig ma gbam-à kwá shi kir, jirà abig ya ku pyù aku dang jír wá.

33 Shìdun ri zìm fig mpìr aku sa swàm wá shan shan bàna. Ku ri zìm mpìr aku sa swàm ábibir.

A byarká ni bidim pár, byar-à mpìrká bu Yesu ma ri kwonn shinn,

34 uwàkà abig pànn shi akim, kada abig dang jír bàna, jir kai bàna big ba sig á tarkada Shìdun ni rag, uwàkà abig shi mpìr wib.

35 Wà uwà ma shi sig ma jír bib, sái aku bib nuwá á lu-à ni. Kada aku bib á sai-à mpìrká ma ri wib Shìdun bàna, jir kai bàna í bu zunái.

36 Kó ning zìm fig jírmí níng bàna rà? Ning ri kyab rag jir Shìdun zu bi sig á byarná ni rà? Kó ning ri kyab rag jir Shìdun fòr yag fig á byar mpìrká kádà ni bàna sái íri ning rà?

37 Wà mpìr zyun ma ri kyab rag ku í mpìr-à ri dang kyann jir Shìdun, kó wà Awun Shìdun ma

ya sig ku gbam, aku yì rag bu-à mì ri ba ya ning níng, í jir Shìdun.

³⁸ Wà kwa zìm fig bàna, aning zu rìg áyauwá ni.

³⁹ To, wunzámí big, áyau bu òsàn káníng bidìm pàr, sái aning yàn kab barà ná dang yì jir Shìdun. Ama mpìr-à ma dang nu jír zyun kim, kada aning kan òm ku bàna.

⁴⁰ Bu-à na sa bidìm pàr, aning sa ábibir bar gbìb-à sàns sig.

15

Barà Yesu Dù Nann Zu Kàng Ma Yonki

¹ Wunzámí big, mì ri zìm n kyab pànn ya ning jir àjwár-à ò rì dinya sig ning níng. Ning rì zìm hing, n bir hing pìkyinn áni ngbam níma.

² A jir shinn jir àjwár-à níng ni, Shìdun zìg zu rìghing ning á bu pyìrná ni, wà na shi sig ma pìkyinn bir ngbam níma á jir Shìdun. Wà ma níma bàna, ning fig sig jir àjwár-à níng átai.

³ Jir àjwár-à ò fig sig á shinn Yesu Kristi ni níng, í wà zyun-à ò dinya sig ning. Jír-à níng sàns kab sig kó wà áni bidìm pàr. Jír-à níng ri tàg yi rag, Yesu Kristi wu sig jir shinn bu pyèryí, àràg barà big ba sig á tarkada Shìdun ni níng.

⁴ Big jì ku, áyau su sara Shìdun gbar dù nann zu kàng ku ma yonki àràg barà big ba sìnns sig á tarkada Shìdun.

⁵ Sái ku bi tàg shinnwá á byar Bitrus, n bi tàg shinnwá á byar yann aswamwá big dwib agban pyànà níng.

⁶ I wà su zyun ku bi tàg shinnwá á byar mpìrká ri bàg ku, big kab hing dari swana. Ayau mpìr káníng ni, kádà shi sig ma áni. Kádà wu rìghing.

⁷ To, ku tàg shinnwá á byar Yakubu, hár n bi tàg jakàng shinnwá á byar yann aswamwá big ni bidìm pàr.

⁸ Barà ku tàg kinn rìghing shinnwá á byar mpìr káníng bidìm pàr, í wà ku tàg shinnwá á byarmí ni. Kó barà ò kinn fig bu bàna níng, ò kà áyaubá ni tinn.

⁹ Ai, ò shi sig àràg mì í wùnshái áyau yann aswamká buwá ni bidìm pàr. N fòr fig wà bá dang rag, mì í wùn aswamwá bàna, jir kai bàna wàri níng mì ri ya mpìrká ri bàg ku shwìn wàni.

¹⁰ Ama Shìdun ma àsànwá ku ya sig mì swàm-à níng. Hár bu-à ku sa sig mì níng, kàng fig bu átai bàna. Bumí ò sa swàm sa sa sa, hár ò sa kab yann aswamká kádà í ò. Ama ò sa fig ma shinnmí bàna, í àsàn Shìdun shi síg ò á kyinnmí ni.

¹¹ To, ama yi bidìm yi ri dang jír wá níng, kó ma í mì, kó ma í big ma ri dinya níng jir Shìdun, bidìm par í bu ízyun. Yi bidìm par yi ri dang jír ízyun á shinn Yesu Kristi ni zyun-à níng bir sig kyinn áni níng.

Barà Mpìrká Wu Rìghing Má Dù Nann Zu Kàng Ma Yonki

¹² To, í bib níng. Barà Kristi dù nann zu kàng rìghing mà amir-à ni, àràg barà yi ri dinya kyann mpìrká níng, bu-à sa mpìrká kádà áyauná ni ri dang rag mpìr má dù nann zu kàng fig bàna, í jir kai rà?

13 Wà nìm má àràng barà ning ri dang rag, ki má dù nann zu kàng fig ma yonki bàna níng, ai Kristi nìm má dù nann zu kàng fig ma yonkiwá bàna.

14 Wà Kristi nìm ma dù nann zu kàng fig bàna, jír-à yi ri dinya ning níng, nìm í jír átai. Pìkyinn birná nìm bàna ma yìr.

15 Wà Kristi nìm ma dù nann zu kàng fig ma yonki bàna, nìm má shi àràng yi ri gim òsáng á jir Shìdun ni, barà yi ri dang rag, Shìdun gbar dù nann zu rìghing Yesu mà shar amir-à ni ma yonki níng.

16 Ning yì hing wà mpìrká wu rìghing níng nìm má dù nann zu kàng fig ma yonki bàna, to, Shìdun nìm má gbar dù nann zu fig Yesu ma yonki bàna.

17 Wà Kristi nìm ma dù nann zu fig bàna, pìkyinn birná nìm bàna ma yìr. Hár tàma-à níng ning nìm shi sig áyau bu pyìrná ni.

18 Mpìrká rì bàg sig Yesu ká wu sig níng, big nìm jànn kà kinn rìghing.

19 Wà pìkyinn biryí á byar Kristi nìm má í jirà yá dù nann zu kàng fig ma yonki bàna, ashiyí nìm má kab bu kó ni bidìm pár.

20 To, yi yì hing í àjai big gbar dù nann zu kàng rìghing Kristi ma yonki. Ku shí nì wà kà pyànn áyau mpìrká má dù nann zu kàng ma yonki.

21 Byar-à ki bi sig níng, ki bi sig á dò jir bu-à bibai-à mpìr zyun sa sig níng. Byar-à yi dìg sig gbìb-à yá dù nann zu kàng ma yonkiyí má, yi dìg sig á byar mpìr zyun ni tinn.

22 Barà yi bidìm pár yi ri wu ki á jir shinn bu bibai-à Adamu sa sig, í barà yá wìm zu á jir shinn

Yesu ni tinn.

²³ Kó ni má dù nann zu kàng áyau su-à Shìdun gib sig níng. Zyun-à dù nann zu sig wà kà pyànn-à níng, í Kristi. Ká má dù nann zu ásimwá ni níng, sái ká shi sig mpìrká buwá. Shìdun má gbar dù big á sai-à Yesu má kàng bi kàng.

²⁴ Sai-à ba dù nann zu rìghing, í wà byar shu dunyaru má vinn. A sai-à níng hi, Kristi má shi shinn kó kai bidìm pàr. Kó kùr, kó àgbam, kó wàu, bidìm pàr kwá sinn kann káníng agang, má zìg kùr má ya kà á vù tawá Shìdun ni.

²⁵ Shìdun sinn kà sig Kristi aku na kùr, kwá gbar tìg wann rìg ká ri ngàng wàníng bidìm pàr, má sinn kà big á mìr bar wàníng ni.

²⁶ Bu-à kwá gbar tìg wann wà kinn shinn-à níng í ki.

²⁷ Shìdun sinn sig kó kai bidìm pàr á mìr bar wàníng ni, àràg barà big ba sig á tarkada Shìdun ni. Yi yì hing Shìdun sinn fig shinnwá á mìr bar Kristi ni bàna. Buwá ku í àsàin-à sinn kà sig bu bidìm pàr á mìr bar Kristi ni, kwá shi fig á mìr bar Kristi ni bàna.

²⁸ Wà Shìdun ma sinn kà gban rìghing kó kai bidìm pàr á mìr bar Kristi ni, í wà Kristi ma shinnwá, kwá sinn kà shinnwá á mìr bar Shìdun ni, jirà Shìdun aku shi shinn kó kai bidìm pàr.

²⁹ Wà mpìr nìm ma dù nann zu kàng fig ma yonki bàna, bu-à sa mpìrká ri wau òr batisma jir shinn mpìrká ká wu rìghing í jir kai rà? Yìrwá nìm í kai rà?

³⁰ Wà mpìrká wu rìghing nìm má dù nann zu kàng fig bàna, bu-à sa yi ri wann tafinn kyann shinnyí, mi ri dang jir Shìdun, í jir kai rà?

³¹ Su ma su mì ri wa shwìn àràng má wúwu jir shinn Yesu. Bu-à sa mì ri dinya ning barà mì ri wa shwìn àdòning, í jirà mì ri fig àjwár á shinn ná ni jirà ning ri sa swàm ma jir Shinn Luyí Yesu Kristi.

³² Sai-à ò mà finn swann Afisa ni, mì ri gbìb shùr ma mpìrká big shi sig ma kyinn àzwànn. Shi àràng mì ri gbìb shùr big wi awúnká ri pànn mpìr. Wà Shìdun nìm ma ri gbar dù nann zu fig mpìr mà amir-à ni bàna, buká ò sa sig níng, nìm bàna ma yìr. Wà mpìr nìm ma dù nann zu kàng fig bàna, nìm má sànsàn kab ayi ji buju, ayi wa shin, ayi fig àjwár á dunyaru, jir kai bàna yá wu rìg akìn hár kinn kinn.

³³ Kada aning zìm abig tonn gban ning bàna. Ning fig hing kó? Wù mpìr kyinn sísàn, wa ri bàg òrì ma mpìr-à bibai, wù má, wá kàng mpìr-à bibai tinn.

³⁴ To, aning kà kàng á akironá ni, aning bàg gbìb Shìdun ábibir, kada aning sa kàng bu-à bibai bàna. Mpìrká kádà áyauná ni yì fig Shìdun bàna. Mì ri dang àdòning jirà a zunái pànn ning.

Dìr Apyú Zyun-à Yá Dìg Níng Barà Má Shi Ani

³⁵ To, mpìrká kádà ri bib rag, “Mpìr-à ma wu rìghing, bá gbar dù nann zu kàng ku ma yonki á shinn rà? Irì òrì-à bá gbar dù nann zu kàng mpìr ma kàhì í wà áni rà?”

³⁶ Kai, jír bibná bàna ma yìr. Aning myàng. Wà mpìr ma tàg hing bu á da-à ni, sái wà yìrwá ma swàr hing, í wà àpyú ri nga nann zu ni.

³⁷ Bu-à wá tàg á jìnn ni, kó amaun, kó za, ama à tàg sig í yìrwá, à tàg fig maiwá bàna.

38 Shìdun ri yá nì bu-à ri nann zu áni írì dír-à ku ri zìm. Kó wà áni shi sig buwá kim kim.

39 Kó àràg wi má, big shi sig ma dír kim kim. Mpìr jíkwìnn shi sig ma dír wá kim, wi awúnn shi sig ma dír wá kim, ayinnbu má shi sig ma dír wá kim, jái á zàpìr-à ni má shi sig ma dír wá kim.

40 To, buká mà wai, dír bá shi sig kim. Buká á jìnn ni, dír bá shi sig kim. Nsònn buká shi sig mà wai shi sig kim ma wà á jìnn ni.

41 Ayúnn shi sig ma nsònn wá kim. Sònn-à shi sig ma buwá kim tinn. Asuswirká má shi sig ma bigbá kim tinn. Ayau bar dír big asuswirká ni má, big shi sig áni kim kim.

42 To, wà níng í barà má shi áni tinn, á sai-à Shìdun má gbar dù nann zu mpìrká big yonki. Dír mpìr-à big jì kà sig ku mà amir-à ni níng, ri swàr rìg. Ama wà zyun-à bá gbar dù nann zu kàng ku ma kàhi níng, má swàr fig áswàr bàna.

43 Sai-à big ri jì kà rìg dír-à níng, ku bàna ma gbar. Nsònn wá bàna áni. Ama wà zyun-à bá gbar dù nann zu kàng ku ma kàhi níng, má shi ma gbar. Má shi shèrá nímá.

44 Dír zyun-à big ri jì níng, kàhi í bu dunyaru. Wà bá gbar dù nann zu kàng mpìr ma kàhi níng í dír àpyú zyun-à Awun Shìdun ri ya mpìr. To, barà yì shi sig ma dír zyun-à má swàr rìg níng, yì yì hing Shìdun má ya yì dír zyun-à má swàr fig bàna.

45 Barà big ba sig á tarkada Shìdun ni, big rag, “Mpìr-à big rì mà m jag sig níng, í Adamu, ku shi sig ma yonkiwá.” Ama Adamu zyun-à ásim

níng, buwá ku shi síg nì mpìr àsàin-à ri ya yonki, mpìr-à níng hi í Yesu.

⁴⁶ Dìr-à Awun Shìdun ri ya níng, bi jag fig nì bàna, ama í bu zyun-à ri swàr níng bi jag síg nì, í wà bu Awun Shìdun bi sig ásim.

⁴⁷ Adamu zyun-à bi jag sig níng, big mà m sig ku ma jànn. Adamu zyun-à bi tib ku níng, bi sig mà byar Shìdun ni mà wai.

⁴⁸ Dìr mpìrká bidim pár shi sig àràg í dìr Adamu zyun-à Shìdun mà m sig ma jànn. Mpìrká ri bàg Kristi bá dìg dìr zyun-à mà wai àràg bu Kristi.

⁴⁹ Àràg barà dìryí zu sig swai nzyun big mpìr-à á dunyaru níng, í barà dìryí má zu kàng àràg bu mpìr zyun-à bi sig á byar Shìdun ni níng.

⁵⁰ To, ning myàng hing kó? Dìr-à íri wi ma àsà má fòr fig barà kwá kà á byar-à Shìdun na sig kùrwá bàna. Bu-à ri wúwu má dìg sar fig bu zyun-à ri shi kinn kinn bàna.

⁵¹ Aning fig jír-à níng. I jír zyun-à Shìdun rì tà m sig. Ayauyí ni, káhi má wu fig bàna. Ama yi bidim pár, Shìdun má vim bìr rìg dìryí.

⁵² Barà yi ri shi, mpìr ri mikab zu, mi ri pù fim níng, í barà yá fig bá winn yur-à wà kinn shinn-à áni tinn. Wà ba winn hing, í wà Shìdun má gbar dù nann zu mpìrká rì wu sig níng ma dìr àpyú zyun-à má shi kinn kinn. Yi mpìrká shi sig ma áni ma yonki níng, dìryí má vim bìr rìg tinn.

⁵³ Dìryí zyun-à ma swàr rìg níng, má vim bìr kàng rìg zyun-à má shi kinn kinn. Dìryí zyun-à ri wu níng, má vim bìr kàng rìg zyun-à má wu fig áwu bàna.

⁵⁴ Sai-à òrìyí ma vim bìr kàng rìghing, ya wu fig rag ki bàna, í wà bu-à big ba sig á jir Shìdun níng má shi àràng barà big ba sig n rag, “Shìdun gbam kan rìghing ki.”

⁵⁵ “Ki má gban fig rag mpìr bàna.

Wù ki, gbamwú má shi rag áni rà?”

⁵⁶ Ki ri òg gbamwá á byar bu pyìr-à yi ri sa níng. Bu pyìr bó ri òg gbamwá á byar doka.

⁵⁷ To, buyí yi kab sig gbam ki á jir shinn Shinn Luyí Yesu Kristi ni. Ayí yan Shìdun jir wàníng.

⁵⁸ To, barà shi sig àdòníng, sái aning sar gbam, ning wunzámí big, aning yag mà pyànn ma swàm Shinn Luyí Yesu, kada bu zyun aku tir ning bàna, jir kai bàna ning yì hing bu-à ning ri sa jir shinnwá níng, má shi fig í bu átai bàna.

16

Jír á Shinn Bài-à Mpìrká Bu Shìdun Ri Kwonn

¹ To, jír á shinn bài-à ning ri kwonn jirà ná sa shang mpìrká bu Shìdun á jànn Yahudiya, aning sa àràng barà ò dinya sig mpìrká bu Shìdun á jànn Galatiya.

² Kó wane àyúnn Ladi aning sinn kwonn bài. Kó ni aku tinn zu bi bu-à ku òg sig áyau su sùmpyànn, ma aku zìg bi. Ama kada aning shi kir mì, wà ma bi hing, í wà aning kwonn bu íni bàna.

³ To, wà ma fòr bi hing, má ya mpìrká ká ning shig zu sig níng wasika, jirà abig zìg yag bài-à ning kwonn sig níng, mà Urushalima.

⁴ Wà ya myàng má sànn kab síg nì, n yag tinn, to, í wà yi big má yag zyun.

Bu-à Bulus Má Sa Mà Pyànn

⁵ To, má bi á byarná ni, ama sai wà ma yag rìghing mà jànn Makidoniya, í wà má bí ni.

⁶ Ama mì ri myàng kó má shi nonn á byarná ni hár sai wà sòn wàu ma wam zu rìghing, í wà ná sa shang mì á kyonnmí wà mà pyànn.

⁷ N zìm fig wà í myàng ning í wam zu kíni bàna. Wà Shìdun ma zìm hing, má shi nonn á byarná ni.

⁸ Má shi ma á finn swann Afisa hár àyúnn buki zyun-à big ri bar Pentikos,

⁹ jir kai bàna Shìdun ya sig mì pyù barà má sa swàm ùwài nímá áyág. Swàm Shìdun ri yag mà pyànn. Ama mpìrká kàhi nìnànn nímá ri zìm abig kan dim mì.

¹⁰ Wà Timoti ma bi fòr hing á byarná ni, aning pànn samyib ku. Kada aku shàr zinn kó títi nímá bàna. Ku má, ku ri sa swàm Shinn Luyí, àràg barà mì ri sa níng tinn.

¹¹ Kada a mpìr myàng rag Timoti kinn fig bu bàna. Aning sa shang ku á kyonnwá ni, ma aning dwim kàng bi ku ítau á byarmí ni. Mì ri shi kir ku, ku ma wunzàkà kádà níng.

¹² Bu wunzàyí Apolos bó, ò vig ku rag aku yag kwonn ma wunzàkà kádà, jirà aku yag myàng kà ning. Ama ku myàng, ku dìg fig ma pyù barà kwá bí á byarná ni tàma-à níng bàna. Sáí wà kwa dìg hing pyù, í wà kwá bí má myàng kà ning.

Jír-à Wà Kinn Shinn

¹³ To, buná aning myàng kwonn ma shinn ná, aning sar gbam áyau pìkyinn birná á byar Yesu. Aning wim kyinn. Aning tib bàg barná.

¹⁴ Bu-à ná sa bidìm pár, aning sa ma kyinn azìm.

¹⁵ Ning yì hing Istifanas ma mpìrká buwá big. Big í mpìrká kà jag sig gbìb Yesu á jànn Akaya. Big du kà hing shinnbá rag bá sa shang mpìrká ri bàg Shìdun.

¹⁶ To, íri mpìrká ri sa swàm àdòning, mì ri zìm aning fig bu-à ba dinya ning, ma aning wib jìrbá. Ká ma ri sa swàm àdòning, aning fig jìrbá tìnn.

¹⁷ N fig hing àjwár barà Istifanas ma Fartunatas ma Akaikas bi á byarmí ni, jir kai bàna big sa ya hing mì bu-à ning dìg fig pyù-à ná sa ya mì bàna.

¹⁸ Big sa mì bu-à pìkyinnmí jwar áni, àràg barà big rì sa jwar sig ning pìkyinn ná. Iri mpìrká àdòning, big fòr hing wà ayi yan big.

¹⁹ Mpìrká ri bàg Yesu á jànn Asiya big ri bib kà ning. Akila ma wàwá Biriskila má, big ri bib kà ning bib bib á zìnn Shinn Luyí Yesu ni. Mpìrká ri kwonn shinn, mi ri wib Shìdun á lubá ni, big ri bib kà ning tìnn.

²⁰ Mpìrká ri bàg Yesu áyag bidìm pár, ri bib kà ning.

Aning bib kà bar dìrná, bib bib.

²¹ Mì Bulus, ò ba síg nì jír-à níng. Mì ri bib kà ning.

²² Mpìr-à ma zìm fig Shinn Luyí Yesu bàna, a Shìdun ya ku nài ya. Shinn Luyí, á bi.

²³ Asàn Shinn Luyí Yesu aku shi kwonn ma ning.

²⁴ Mì ri zìm ñing wàni, jir kai bàna á gbìb Yesu Kristi yi bidìm pàr yi í bu nzyun.

lviii

Jibu
Jibu: Jir Shidun (New Testament)

copyright © 2019 Wycliffe Bible Translators, Inc.

Language: Jibu

Contributor: The Nigeria Bible Translation Trust

All rights reserved.

2025-05-06

PDF generated using Haiola and XeLaTeX on 5 May 2025 from source files
dated 6 May 2025

a1139895-fa13-5ff1-8c00-a8ad25fcfa2f